

मत्ती

यीसु केर बंसावली

1 अबराम केर सन्तान, दाऊद केर, सन्तान, यीसु मसीह केर बंसावली।

²अबराम ते इसहाक पैदा भवा, इसहाक ते याकूब, अउर यहूदा अउर वहिके भाई पैदा भवा।

³यहूदा ते फिरिस, अउर यहूदा अउर तामार ते जोरह पैदा भवा; अउर फिरिस ते हिस्त्रोन भवा, अउर हिस्त्रोन ते एराम पैदा भवा; ⁴अउर एराम ते अम्मीनादाब भवा; अम्मीनादाब ते नहसोन अउर नहसोन ते सलमोन केर जनम भवा।

⁵सलमोन अउर राहब ते बोअज पैदा भवा बोअज अउर रुत ते ओबेद केर जनम भवा, अउर ओबेद ते यिसै के जनम भवा।

⁶अउर यीसु केर हियां दाऊद राजा जनम भवा। ⁷अउर दाऊद सुलेमान ऊ अस मेहरिया ते पैदा भवा जउन पहिले उरियाह केर ब्याहता रही।

⁸अउर सुलेमान ते हियां रहुबाम केर जनम भवा, अउर रहुबाम केर लरिका अबिव्याह भवा, अबिव्याह ते हियां आसा केर जनम भवा, अउर आसा केर लरिका यहोसाफात पैदा भवा, अउर यहोसाफात के हियां योराम केर जनम भवा अउर योराम ते उईजयाह भवा।

⁹उईजयाह के योताम भवा; योताम ते आहाज पैदा भवा, अउर आहाज के हियां हिजकियाह केर जनम भवा।

¹⁰हिजकियाह के हियां मनस्सिह जनमें अउर मनस्सिह सौं आमोन, आमोन ते योसियाह पैदा भवा।

¹¹अउर बंधुआ होई के बाबुल जाय केर समय योसियाह ते यकुन्याह, अउर उनकेर भाईन केर जनम भवा।

¹²बंधुआ होय के जब बाबुल ने जवाइदीन गयै उइके बाद यकुन्याह ते सालतिएल भवा, अउर सालतिएल ते जरुब्बाविल केर जनम भवा।

¹³अउर जरुब्बाविल के हियां अबीहूद पैदा भवा, अउर अबीहूद ते इल्याकीम केर जनम भवा अउर इल्याकीम ते अजोर भवा।

¹⁴अजोर ते सदोक भवा, सदोक ते अरखीम पैदा भवा, अउर अरखीम ते इलीहूद पैदा भवा।

¹⁵अउर इलीहूद ते एलियाजर अउर इलियाजर ते मत्तान पैदा भवा, मत्तान ते याकूब पैदा भवा।

¹⁶याकूब के हियां युसूफ पैदा भवा, जउन मरियम केर पति भवा रहै उनहीं के लरिका यीसु मसीह जउन कहलात है, पैदा भवा।

¹⁷अबराम ते दाऊद तक के कुल चौदह पीढ़ी भयी, अउर दाऊद ते बाबुल मा बंधुआ बनाइके भेजो जाये केर चौदह पीढ़ी, अउर बंधुआ होइके बाबुल का पहुँचाय जाये तक की बेरिया ते लैके मसीह तक चौदह पीढ़ी भई।

यीसु मसीह केर जनम

¹⁸यीसु मसीह केर जनम इ तिना ते भवा कि जब उनके महतारी मरियम केर सगाई मंगनी युसूफ के साथ हाइगै तो उनके मिले ते पहिले पवित्तर आतमा केर ओरिया ते पांव भारी होई गवा अउर मरियम पेट से होई जात हैं। ¹⁹सो जउने उनके मरद युसूफ धरम करम का मान रहेंय अपन मेहरिया का बदनाम नाहीं होने करा देवा चाहत रहै। यही कारन अपनी मेहरारु को छोड़ दैवेक मन बनाइस।

²⁰जब इन बातन का स्वाँचत रहै, तबै उन क्यार सरग ते भ्याजा दूत अपने मार दयखाई दिहिस अउर उनते कहिस अरे युसूफ दाऊद केर लरिका तू अपनि मेहरिया मरियम क अपनि घरे मा राखै ते मत डेराव, जउन वहिके गरभ मा है, ऊ पवित्तर आतमा केर ओर ते हवै। ²¹ऊ लरिका जनमी; अउर तू उहके नाम 'यीसु' रखिहौ, वहै ऊ अपनि सबै लोगन के पापन ते उबारी।

²²ई सब कुछ ई कारन भवा जउन बचन परभु के

भविष्यवक्ता ते सुनाइस रहै तब सब साचि भवा।
²³कै देखऊ एक कुंवारी कै पैर भारी होइ अउर एक
 लरिका जनमी अउर वहिके नामु “इम्मानुएल” धरा
 जाई जेहि कै मतलब ई हवै, परमेशुर हमरे साथ हवै।

²⁴याहिते युसूफ नींद ते जागिके परभु के दूत केर
 आग्या के मुताबिक अपनि मेहरिया क अपनि घर लै
 आवा। ²⁵अउर जब तलक लरिका कै जनम नाहीं
 भवा तब तलक अपनि मेहरिया के पास नाहि गवा
 अउर ऊ लरिका के नाम यीसु रखिस।

ज्योतिसिन केर आइब

2 हेरोदेस राजा केर दिनन म जब यहूदियन के
 बैतलहम गावन म यीसु केर जनम भवा। तौ
 पूरब ते कई ज्योतिस के जानकार यरुसलम म आइके
 लोगन ते पूछिन लागे।²कि यहूदियन राजा जेहिके
 जनम भवा है ऊ कहाँ हवै? मुला हमका पूरब दिसा
 मा ऊकै नखत दिखाई दिहिस है। तउने हम कुल
 उनकै परनाम करन कै खातिर आयेन हय।

³ई सुनिके राजा हेरोदेस अउर सारी परजा बहुते
 घबराय गवा। ⁴अउर हुँआ कै सबै ज्योतिस के ओर
 महायाजकन कै बोलाई केर जमा किहिस अउर
 पूछिस कि मसीह कै जनम केहर होके चाहि? ⁵उई
 सबे राजा ते कहिन यहूदिया के बैतलहम मा, काहे
 ते नबी लोगन ई लिखि दिहिन है।

⁶कि हे बैतलहम, जउन यहूदा के देस मा हैं, तू
 कउनो रीति ते यहूदा के अधिकारीन में सब ते छोटी
 नाहीं, काहे ते तोहरे सब मा ते एकु महान अधिपति
 निकरी, जउन इसराएल परजा केर रखबारी करी।

⁷तबै हेरोदेस ने ज्योतीसियन कै चुपके ते बुलायके
 पूछत कि, नखत केतने बजे देखे पड़ा रहे।

⁸अउर उनते ई कहिके सबका बैतलहम भेज
 दिहिस कि तुम सब जाईके पैदा भये बालक के बारे
 म ठीक—ठीक पता लगाव अउर जब ऊ मिलि जाय,
 तौ हमका सदेसु भ्याजौ ताकि हम जाय कै ऊका
 परनाम करी।

⁹ऊ सब राजा केर बात सुनिके चले गये, अउर
 देखौ जउन नखत उई पूरब मा देखन रहै, वहै नखत
 उनके आगे—आगे चले लाग अउर जहां ऊ बालक
 रहै, हुआ जाई कै वहै जगा सकि गवा।

¹⁰ऊ नखत का देखिके सबै बहुते खुस भयै।
¹¹अउर वहि घर में जाइके महतारी मरियम के साथ
 मा देखिन अउर मुहि के बलि झुकि कै उनका परनाम
 किहिन; अउर आपन—आपन झोला खोलि के उनके
 सोना, अउर लोहबान अउर महकै वाला सामान

चढ़ाइन। ¹²अउर सपना मा ई परभु क आदेसु भवा
 कि हेरोदेस के पास अब न जायो, उइ सब दूसरे
 रस्तन ते अपने देस क चले गवा।

मिसर देस क जाओ

¹³उनके चल जाइके बाद म परभु कै एकु दूत
 सपने मा यूसुफ का दिखाई देके कहिस कि उठउ ई
 बालक का उइ की महतारी का लइके मिसर देस का
 भागि जात, अउर जब तलक हम तुमते न कहूँ, तब
 तलक तू वहीं रहियो, काहे ते राजा हेरोदेस ई बच्चा
 का ढूँढि है, ताकि ओका मारवाय डारै।

¹⁴वह रात का ही उठि कै महतारी लरिका का
 लइके मिसर देस का चला गवा। ¹⁵अउर हेरोदेस के
 मरिजाई तक हुवई रहा, यही कारन ऊ बचन जउन
 परभु ते भविष्यवक्ता ते कहवाइन रहै, कि अपने
 लरिका का हम मिसर मा बुलायेन रहै पूरा होय गवा।

लरिकन के मारे के आदेस भवा

¹⁶जब हेरोदेस ई देखिन कि ज्योतिस उनके धोखा
 दिहिन अउर सब हमरे साथे टट्टा किहिन है तबै
 उइके बड़ा गुस्सा आवा अउर कुछ लोगन का भेजि
 कै ज्योतिसियन ते सही—सही पूछे समय ई देखिन
 हिसाब अउर आग्या दिहिस कि बैतलहम अउर
 वहिके आसपास के सब बचन का जऊन दूइ साल
 के या औसे छोट रहे मरवाइ डारिस। ¹⁷तब जउन
 बचन यरमयाह नबी कहिस रहै ऊ पूरा भवा।

¹⁸कि रामाह मा एकु दरद भरी आवाज सुनाई परी
 “रोई के विलाप, करत रहे। राहेल अपनि बच्चन
 खातिर रोवत रही अउर चुप होय नाहीं चाहत रही
 काहे ते वै रहे नाहीं।”

नासरत केर लउटब

¹⁹हेरोदेस केर मरै के बादे देखौ, परभु कौ दूत
 मिसर मा युसुफ का सपने मा दिखाई देके कहिस
²⁰कि वहि बच्चा अउर वहिकी महतारी का लइके
 इसराएल देस क जाओ, अउर जउन बालक कै परान
 लेना चाहत, रहे उ मरिगये”

²¹वहु उठा, अउर लरिका अउर महतारी को साथ
 लइके इसराएल देस मा लै आवा। ²²मगर ई सुनि
 के कि अरखिलाउस अपने बापू हेरोदेस केर जगह
 यहूदिया कै राजा बना है हुआ जाये ते डेरान अउर
 सपना मा चितौनी पाइ के गलील देसु चला गवा।
²³अउर नासरत नाम केर नगर मा जाय के बसि गवा
 ताकि, ऊ बचन पूरा होई जाय, जउन नबी लोगन

कहिन रहै, कि ऊ नासरी कहाई।

यहुन्ना बपतिसमा केर सन्देसु

3 उन दिनन म यहुन्ना बपतिसमा दै वालन आइकै यहूदिया के जंगल मा ई परचार करै लाग। ²कि मन का बदलौ; काहे ते सरग का राज नेरे आवे वाला है। ³इव वहै है जेहि कै चरचा यसायाह नबी केर दवारा लीन गई कि जंगल में केहू के पुकारइ का आवाज सुनाई परी कि परभु का मारग तैयार करौ, अउर ओकरि सड़कन क साज करउ।

⁴यहुन्ना ऊँट केर बार का कपड़ा पहिनत रहै अउर अपन कमर मां चमड़ा कै पटुका बांधे रहै। अउर ऊके अहार टिड्डियां बन अउर सहद रहै। ⁵तब येरूसलेम अउर सारे यहूदियन कै, अउर यरदन के आस पास केर सब देसन कै मनइ। ⁶उइके पास निकल आये अउर अपन पापन का मानि के यरदन नदी मा उनते बपतिसमा लिहिन।

⁷जब उइ तमाम फरीसियन अउर सदूकियन क अउर यहूदियन का बपतिसमा लैने के खातिर आवत देखात तौ उनते न कहिन कि हे सांपन कै बच्चउ तुमको के बताइस कि आवै वाले परकोप ते बचै को भागे। ⁸सो मन फिराब के जोग फल। ⁹अउर अपने मन मा ई न सोचउ, कि हमार बापू अबराम है। काहे ते कि तुहिते बताइत है कि परमेसुर ई पथरन ते अबराम खातिर सन्तान पैदा करि सकत है। ¹⁰अउर अब कुल्हाड़ा बिरवान केर जर पे रखा है। ई मारे जौन बिरवा नीक फल नाहीं देत ऊ काटि कै आग मा डाल दीन जात हवै।

¹¹हम तौ पानी ते तुम्हार मन बदले खातिर बपतिसमा देइत हैं। लेकिन हमरे बादि आवे वाला है ऊ हमते जोरदार है। हम तौ उनकी जूती उठाउन लाइको नाहिन हम ऊ तुमको पवित्तर आतमा अउर आग ते बपतिसमा देई। ¹²ओके पछोवन ऊकै हाथ मा है। ऊ आपन खरिहान नीक तना साफ करी अउर अपने गेहूँ क खत्ती मां यकड़ा करी मुला भूसी ऊ आग मा जलाई जउन बुझय केर नाहि।

यीसु केर बपतिसमा

¹³ऊ बखत यीसु गलील ते यरदन के तीर पै यहुन्ना के पास ऊ ते बपतिसमा लेने आवा। ¹⁴मुला यहुन्ना ई कहिकै ऊका रोके लाग कि हमका तुम्हरेन हाथ ते बपतिसमा लैक जरुरति है, अउर तुम हमरे पास आये हौ?

¹⁵यीसु वहिका उत्तर दिहिन कि अब तौ ऐसन

होय दियो, काहे ते हमका यहितिना ते सबै धरम का काम पूरा करब नीक लागत है। तब यहुन्ना उनकी बात मान लिहिस।

¹⁶अउर यीसु बपतिसमा लैइकै तुरतै ऊपर आवा अउर देखिन, कि उनकी बदे आकास खुलि गवा। अउर वह परमेसुर केर आतमा का कबूतर केर नाई उतरत अउर अपने ऊपर आवत देखि। ¹⁷अउर देखौ, सरग ते इ आकासबानी भइ कि ई हमार पियारा लरिका है, जेहिते हम बहुतै खुस हन।

यीसु केर परिच्छा

4 उई बखत पवित्तर आतमा यीसु का जंगल मा लै गवा जैसे सैतान ते उकी परिच्छा होवे। ²ऊ चालीस दिन निराहार रहै, आखिर मा ऊकै भूख लागि। ³तब परखवइया वहिके पास आइकै ओते कहिस अगर तुम परमेसुर केर लरिका हौ तौ कहिहौ कि ई पथरन रोटी बन जाय।

⁴ऊ उत्तर दिहिस कि लिखा है कि मनइन रोटीन ते नाहीं, वरन परमेसुर के मुंह ते निकलत है ऊ अमर रही।

⁵तब सैतान ऊ का पवित्तर नगर मा लै गवा अउर मन्दिर के कगरे पर खड़ा किहिस। ⁶अउर वइते कहिस कि जउन परमेसुर के लरिका हौ त खुदई का नीचे गिराय देव काहे ते लिखा है कि ऊ तोहरे बारे मा अपने सरग दूत क हुकुम देई अउर उठा लेई कहुँ ऐइस न होई कि तुम्हरे पांव मां पत्थर ते ठोकर लागे।

⁷तब यीसु ओसे कहिन कि यहू लिखा हवे कि तुम अपन परभु अपने परमेसुर केर परिच्छा न करौ।

⁸फिर सैतान फिर वहिका बहुत ऊँचे पहार पर लै गवा अउर कुल संसारे केर राज अउर ऊ का वभव दिखाइस। ⁹उहि ते कहा कि जउन तुम गिरि के हमका परनाम करौ तौ ई कुल तुमका दै देबे।

¹⁰तब यीसु उनते कहिन कि अरे सैतान तू दूर होइ जा काहे ते लिखा है, तू परभु अपने परमेसुर को परनाम करके वहिकी उपासना करौ।

¹¹तब सैतान ऊके पास ते चला गवा अउर सरग के दूत आइकै उह कै सेवा करै लागि।

यीसु दुआरु परचार

¹²जब ई सुनिस कि यहुन्ना पकड़ लिया गवा गवा तौ ऊ गलील क चला गवा। ¹³अउर नासरत का छोड़ के कफर नहूम मा झील केर किनारे जबूलुम अउर नपताली केर देस मा जाइके रहे लागे। ¹⁴यहिते जउन यसायाह नबी कहिन है ऊ पूरा होय।

¹⁵कि जबूलून अउर नपताली के देस, झील के रस्ता ते यरदन के पार अन्य जातीन केर गलील।

¹⁶जउन लोग अंधकार म बैठे रहे उनही बड़ा उजेर देखिन, अउर जउन मौत के देस अउर छाया मा बैठे रहै, उन पै जोति चमका।

¹⁷उई बखत ते यीसु परचार करै काहे कि इ कहै लागे कि मन बदलौ अउर सरग केर राज पास आवा है। इन सबके यीसु सबते पहिले बुलाइन जऊन उनके चेलवा भये।”

पहिले चेलन का बुलाया जाना

¹⁸अउर ऊ गलील केर झील के किनारे फिरत भवा दुई भाई अरथात् समौन को जउन पतरस कहवत है, अउर उनके भाई अन्द्रिययास का झील मा जालु डारत देखिन; काहे ऊ मछुआरन रहे। ¹⁹अउर उनते कहिस, हमरे पाछे आव, तौ हम तुमका मनइन को पकरै वाला बनाइवै। ²⁰ऊ तुरन्त जालन के ओकरे पाछे हुई लीन।

²¹अउर हुवां ते आगे बढ़िके अउर दुई भाई अरथात् जबदी केर लरिका याकूब अउर उनके लरिका यहुन्ना अपने बापू जबदी के साथे नइया पर अपने जाल का सुधरत भये देखा अउर उनहका यीसु बुलाइन। ²²ऊ तुरन्त नाव अउर अपने बापू के छोड़िके उनके पाछे हुई लिहिन।

यीसु दुआरा रोगी केर चंगा करब

²³अउर यीसु सारे गलील मा फिरत भवा, उनकी सभन म उपदेसु करत अउर नगर म सुसमाचार परचार करत रहा, अउर लोगन केर हर तिना केर बीमारी अउर कमजोरी दूर करत रहै। ²⁴अउर सारे सूरिया म उनके जस फैलि गवा; अउर लोग सब मरीजन का जउन तरह—तरह दुखन की बीमारी अउर दुख मा पड़े रहे अउर जिनमा दुस्त आतमा रही अउर मिरगी वाले अउर लकवा के मारे हुआं का उनके पास लाये अउर उनका ठीक किहिन। ²⁵अउर गलील अउर दिका पुलिस अउर यरुसलेम अउर यहूदिया ते अउर यरदन के तीर ते भीड़ केर भीड़ उनके पीछे—पीछे चलै लाग।

पहारु उपदेसु

5ई भीड़ के देखि कै, पहारु पै चढ़ि गवा; अउर बैठि गवा, तौ उनके सब चेला उनके नेरे आये।

²उई अपन मुहं खोलि के उनका ई उपदेसु देय लाग।

³धन्य हैं उई जउन मन केर दीन हवै, काहे ते सरग

का राज उनहिन क हवै।

⁴धन्य हैं उइ जउन सोक करति हैं, काहे ते कि उइ सान्ती पइहै।

⁵धन्य हैं उइ, जउन नरम स्वभाव केर हैं, काहे उई धरती पै रहै का अधिकार राखत हैं।

⁶धन्य हैं उइ, जउन धरमु के विचार से हवै अउर उनके पियास बुझाई जाई।

⁷धन्य हैं बे, जउन दया करत हैं, काहे ते उनके ऊपरौ दया कीन जाई।

⁸धन्य हैं उइ जिनके मन साफ हैं उइ जउन मेल करवावत हैं काहे ते परमेसुर केर दरसन करिहै।

⁹धन्य हैं उइ, जउन मेल करवावत हैं, काहे ते परमेसुर केर लरिका कहलइहै।

¹⁰धन्य हैं उइ, जउन धार्मिकता के खातिर सताये जात हैं, काहे ते सरग मा उनहिन के राज होई।

¹¹धन्य हौ तुम जउन हमरे कारन मनइन तुमार बुराई करै अउर सताये अउर झूठ बोलि—बोलि के तुम्हरे खिलाफ सब तिना ते बुरी बात करै। ¹²बहुत खुस होईके मगन होय, तुमरे खातिर सरग मा बड़ा फलु है। यही कारन उइ उन नबी लोगन क जउन तुमते पहिले रहै यही तिना सतावत रहै।

लोनू अउर जोति केर मिसाल

¹³तुम धरती के लोनू हौ, मुला जदि नमक का सवाद बिगारि जाय, तौ कउन चीज ते नमकीन कीन जाई फिर ऊ कउनउ काम का नहीं, खाली ई के कि बाहर फेंकि दीन जाय, अउर मनइन के पैरन तले रौंदा जाय।

¹⁴तुम जगत केर जोति हौ। जउन नगर पहारु पै बसा भवा है, ऊ छिप नाहीं सकत। ¹⁵लोग दिपक जलाय के पैमाने केर नीचे नाहीं मुला देवाल के उपर राखत हैं तब जाइके सारे घर मा उजियार होत है। ¹⁶वही तिना तोहार उजियार सब के सामने चमके कि तुम्हरे भले कामन का देखिके कइहन तुम्हरे बापू जउन सरग मां है, बड़ाई करै।

पुरान अउर नवा नियम

¹⁷ई न जानौ, कि हम सबै काम नबी लोगन का अउर किताबन का खतम करै आयेन हैं। ¹⁸खतम करै नहीं, मुला पूरा करै आयेन हैं, काहे ते हम तुम सब ते सांच कहित हैं। ¹⁹यही कारन जो कोई इन छोटी ते छोटी आग्या में ते काऊ एकु का तोड़े, अउर वैइसै लोगन का सिखावै, ऊ सरग के राज या सब ते छोट कहवाई; मुला जो कोऊ उनका मानी अउर उनका

सिखाई ऊ सरग के राज मां महान कहवाई।²⁰काहे ते हम तुमते कहित है कि यदि तुम्हार धार्मिकता सास्त्रियन अउर फरीसियन केर धार्मिकता ते बढिके न होय, तौ तुम सरग के राज म कबऊ परवेस नाहीं कर पइहव।

हतिया

²¹तुम सुनि चुके हवै, कि पहिले केर मनइन ते कहा गवा रहै कि हतिया ना करिहौ, अउर जउन कउनो हतिया करी ऊ कचहरी मा सजा पाई।²²मुला हम तुमते ई कहित है कि जउन कउनो अपन भाइयन पै गुस्सा करी, ऊ कचहरी मा सजा पाई अउर जउन कोउ अपने भाई केर निकम्मा कहिन ऊ महासभा म सजा पावै लायक होई, अउर जउन कोई कहै, “अरे मूरख” ऊ नरक केर आगि मा सजा पाई।

²³यही बदे तू आपन भेंट बेदी पै लावो अउर हुवां तुम ये याद करौ, कि हमरे भाई के मन या हमरी ओर ते कुछ खिलाफत हई, तौ आपनि भ्यांट वही बेदी के सामने छाड़ि देऊ।²⁴अउर जाई कै पहिले अपन भाई ते मेल जोल करौ तब आइके अपन भेंट चढ़ाओ।

²⁵जब तक तुम अपने मुद्ई के साथे रस्ता मां तुरतै मेल जोल कई लेव, कहुँ अइसह न होय कि मुद्ई तुमका हाकिम का सौउप दे अउर हाकिम तुमका सिपाही का सौउप दे अउर तू कैद खाने मा डारि दीन जाव।²⁶हम तुमते सांची कहित हन, जब तक तुम कोड़ी-कोड़ी न भरि देहौ तब तलक हुवाँ ते छूटै न पाइहौ।

व्यभिचार केर बारे मां

²⁷तुम सुनि चुके हौ कि कहा गा रहै कि व्यभिचार न किहयौ।²⁸मगर हम तुमते यह कहित है, कि जउन कउनउ मेहरिया पै बुरी नजर डारि ऊ मन मा वहिते व्यभिचार कर चुका है।²⁹अगर तुम्हार दहिनी आँखि तुमहिन का ठोकर देय, तौ तू वहिका निकाारि के फेंकि देउ काहे तुम्हरे खातिर यहै भला है कि अंगनु ते एकु नासि होई जाई, अउर तुम्हरि सारी सरीर नरकु म न डारि जाय।³⁰अउर यदि तुम्हार दाहिना हाथु तुमहिन क ठोकर देइ तौ उहिका अपने पास ते काटि के फेंकि देउ, काहे ते तुम्हरी लिए यहै भला है कि तुम्हरे अंगन मा ते एकु का नासि होई जाई अउर तुम्हारि सारी द्याँह नरक मा न डारी जाय।

तलाकु

³¹यहै कहा गवा रहै कि जउन कोऊ अपने मेहरारू

क तियाग देई, तौ उहिका तलाक देयक परी।³²मुला हम तुमते जउन कहित है कि अपन मेहरारू का बुरे काम के सिवाय काउने अउर कारन ते छोड़े दे, तौ उहिते व्यभिचार करवावत है, अउर जउन कोऊ वहि तलाक वालि ते बियाहु करि, वहै व्यभिचार करवावत है।

सपथ

³³फिर तुम सुनि चुके हौ, कै पहिले समय के लोगन ते यह कहा गवा रहै कि झूठी कसम न खायेव, मुला परमेसुर खातिर आपन कसम पूरी करेउ।³⁴मुला हम तुमते ई कहित है कि, कबहुँ सरग केर कसम न खायेव काहे ते बहु परमेसुर क सिंहासन हवै।³⁵न धरती केर, काहे ते बहु उनके पावन केर चौकी आय, न येरुसलेम केर, काहे ते बहु महाराजा केर नगरु आय।³⁶अपनि सिर केर कसम न खायेव काहे ते तुम एकु बारु क न तौ सफेद करि सकै न तौ करिया कर सकतु हौ।³⁷मुला तुम्हारि बाति हाँके केर हां, या नाहीं केर नाहीं होय; काहे ते जउन कुछु होयगो ऊ बुराई ते होई।

बदला केर बारे मां

³⁸तुम सुनि चुकेउ है यहु कहा गवा रहा कि आँखि के बदले आँखि, अउर दाँत कै बदले दाँत।³⁹मुला हम तुमते ई कहित है कि बुराई केर सामना न करिहौ, मुला जउन कोऊ तुम्हरे दहिने गाल पै थपर मारै वहिकै ओरि दूसरौ गाल फेरि देउ।⁴⁰अउर अगर तुम्हरे ऊपर कउनउ नालिस लेन चाहे तौ वहिका दोहरौ लै लेन देउ।⁴¹अउर जउन कोऊ तुमका कोस भर बेगार लै जाय, उके साथ दुई कोस जाउ।⁴²जउन कोऊ तुमते उधारु माँगै, वहिते मुंह न म्वारौ।

बैरी सइहन पिरेम

⁴³तुम सुनि चुकेउ रहो कि परोसी सइहन पिरेम करौ अउर अपने बैरी ते बैर।⁴⁴मुला हम तुमते ई कहित है कि अपने बैरिन ते पिरेम करौ अउर जो तुमका सतावै उके खातिर पराथना करौ।⁴⁵जहिते तुम अपने बापू जउन सरग मा हैं केर सन्तान ठहरियो, काहे ते बहु भलेन अउर बुरेन दुनौ पै अपन सूरज उदय करत है, अउर धरमिन अउर अधरमिन पर अपन पनिआ बरसावत हैं।⁴⁶काहे ते अगर तुम अपन पिरेम राखै वाले तेही पिरेम राखौ, तौ तुम्हरे खातिर कउन फल होइ? का चुंगी लै वाले ऐसि नहीं करत हैं?⁴⁷अउर अगर तुम खाली अपने भइयन का नमसकार

करत हौ, तौ कउन सौ बड़ा काम करतु है का दूसर ऊ धरम वाले ऐसि नहीं करत हैं।⁴⁸यही खातिर यह सिद्ध बने कि जइसन सरग मां तोहार बापू सिद्ध हवें।

गुपतदान

6सावधान रहौ! तुम मनइन का देखावे की खातिर अपने धरम के काम न करौ। नाहीं तौ सरग मां रहै वाले बापू ते कउनौ फलु ना पाइहौ।

²यहिते, जब तुम दान करौ, तो अपने आगे तुरई न बजावा, जइस कपटी लोग सभान में अउर गलीन मा करत हैं, जेहिते उइ लोग बड़ाई करै, हम तुमते सही कहित हैं। कि ऊ आपन फल पाय चुकै।³मुला तुम जब दान करेव तो जउन तुम्हार दहिना हाथु करत है, वहिका तुम्हार बावां हाथु न जानि पावै।⁴जेहिते अउर जउन तुम्हार बापू गुपतौ मा दयाखत हैं। तुमका फलु देई।

पराथना

⁵अउर जब तुम पराथना करौ, तो कपटिन कै समान ना हो, काहे ते लोगन कू दिखाइबे खातिर सभान मां अउर सड़कन के म्याड़न पै खड़े होइकै, पराथना करत उनहुन क अच्छा लागत है, हम तुम ते सांची कहित हैं उइ आपन फलु पाई चुकै।⁶मुला जब तू पराथना करौ, तो अपनी कोठरिन जाइकै, अउर दरवाजा बन्द करिके अपन बापू ते जउन गुपत मा हैं, पराथना करौ अउर तुम्हार बापू जउन गुपतौ मा दयाखत हैं वहु तुमका फलु देई।⁷पराथना करत समय, दूसरे धरम क माने वालन की तरह बक-बक न करौ, काहे ते उइ समझत हैं कि उनके बोले ते उनकी सुनी जाई⁸सो तुम उनकी नाई न बनौ, काहे ते तुम्हरे बापू तुम्हरे मांगे ते पहिले जानित है कि तुम्हरिउ कौनि-कौनि जरुरत हैं।

⁹ऊ तुम इस रीति ते पराथना कीन करौ कि, 'हे हमारे बापू, तू सरग मा है, तोहार नाम पवित्र माना जाई।

¹⁰तोहार राज आवै। तेरी इच्छा जैसेई सरग मा पूरी होत है, वैइसेन धरतिउ पर भी पूरी होय।

¹¹हमका दिन भर केर रोटी आजु कै तुमहू हमका देउ।

¹²अउर जइसे हम अपने अपराधिन का माफ किहिन है, वइसेन तुम हमरे अपराधन का माफु करउ।

¹³अउर हमका परिच्छा मा न लावौ, मुला बुराई सइहन ते बचावउ। काहेते राज, पराकरम अउर महिमा कुल तुम्हरेन है। आमीन।

¹⁴जेहि खातिर अगर मनइन कै अपराध माफु करिहौ तो तुमहुक सरग मां रहै वाला बापू माफु करी।¹⁵अउर अगर तुम मनइ कै अपराध माफु न करिहौ तौ तुम्हार बापू भी तुम्हार अपराधन का माफु न करी।

उपवासु — वरत केर नियम

¹⁶जब तुम उपवास करौ, तौ कपटिन केर नाई तुम्हरे मुंह पर उदासी न छाई रहै। काहे ते उई आपन मुंह बनाये राखत हैं। जेहिते लोग उनको उपवासी जानै। हम तुमते सांची कहत है कि उई अपना फलु पाय चुकै।¹⁷मुला जब तू उपवास करै तौ अपने सिर पै तेलु मलउ अउर मुँह धावौ।¹⁸जेहिते मनइन नाहीं जानिहे मुला तोहार बापू जउन गुपत मा हवै ऊ तुमका उपवासी जानैई, हालत मां तुम्हार बापू जउन गुपत है सब देखत है तुमको फलु देई।

सरग मां धन संचय

¹⁹अपनेइ बदे धरती पै धन यकड़ा न करौ; जहां कीड़ा अउर काई उहिका बिगारत है, अउरु जहां चोरु सेंधि लगावत अउर चुरावत है।²⁰अउर अपनी खातिर सरग मा धन बटोरब, जहवां न तो कीड़ा है अउर न कउनो बिगारी अउर न चोर सेंध लगइहै; न कउनो चुरावत है।²¹काहे ते जेहाँ तुम्हार धन है, ओहरे तुम्हार मनऊ लाग रही।

²²देह केर दीया आँखि है जौ तुम्हार आँखि निरमल है तौ तुम्हार सारी दयाहौ उजियार रही।²³अउर तुम्हरे आँख बुरी है तो सबै दयाह अधियारु होइ। यही कारन जउन उजियार तुम मां है अगर अधियारु होई तौ ऊ अधियार कतिक बड़ा होई।

²⁴कउनउ मनइ दुई स्वामिन केर सेवा नाहीं कर सकत, काहे ते एक ते बेरु अउर दूसरे ते पिरेमु राखी, अउर एकु ते मिला रहि है, अउर दूसरे तुच्छ जानी। "तुम परमेसुर अउर धन दोनव केर सेवा नाहीं कर सकत हौ।"

चिन्ता मत करौ।

²⁵यहि ते हम तुमते कहित है कि अपनी जान की खातिर ई सोंचु चिन्ता जनि करेउ कि हम का खाइवै अउर का पीवै? अउर न अपने सरीर खातिर कि हम का पहिनवै? का परानु भोजन ते, अउर सरीर कपड़न ते बढ़कइ नहिन है? ²⁶आकास के पंछिन के दयाखौ, वो न ब्वावत है अउर न काटत है अउर न खेतन मां बटोरत हैं। तबौ तुम्हार सरग मा रहै वाले बापू उनका खियावत है का तुम उनते ज्यादा कीमत नाहीं रखतु

हैं।²⁷तुममा कउन है जउन चिन्ता करिके आपन उमरि में एक घरी बढ़ाय सकत है?

²⁸अउर कपड़न खातिर काहे सोचु करतु है? जंगली सोसनन पै सोचउ कि उइ कइसे बढ़त हैं, उइ न तौ मेहनत करत हैं, न काटत हैं।²⁹तबहूँ हम तुम ते कहत हैं कि सुलेमान भी अपने सगरे विभव में उनमां ते कउनउ के समान कपड़ा पहिनेन नाहीं रहा।³⁰यही कारन जब परमेसुर मैदान केर घास का, जउन आज है, अउर कल भारु मा झोंकि जाई ऐसन कपड़ा पहिरावत है, तो हे कम विस्सवासिन तुमका काहे न पैहिरइहें? ³¹यही कारन तुम चिन्ता कइके ई न कहेउ कि हम का खइवै का पीवै, अउर का पहिनवै? ³²काहे ते दूसर धरम माने वाले इन सब सामानन केर खोज मां रहत हैं, अउर तुम्हरे सरग मा रहै वाला बापू जा बात क जानें है, कि ई सबै सामान तुमकूँ चाहि। ³³एहि कारन पहिले तुम उनके राज अउर धरम केर खोज करौ तौ तुमहिन का ई सबै सामान मिली जइहें? ³⁴तौ काल्हि की खातिर चिन्ता न करौ, काहे ते काल्हि क्यार दिनु आपन चिन्ता खुदै करि लेई; आजु केर खातिर आजुई का दुखु बहुत है।

दोसु लगाए के बारे मां

7दोसु न लगाउ, जेहिते तुमहूँ पै दोसु न लगावा जाई।²काहे ते जउनी तिना तुम दुसरेन पै दोस लगावत हौ, वही तिना तुम्हरेन पै दोसु लगावा जाई; अउर जउने नापु ते तुम नापति हौ, उहिते तुम्हरेन खातिर नापा जाई।

³तुम काहेक अपन भाई केर आँखु कै तिनका देखत हौ, अउर अपन आँखि क लट्टा तुमका नाहीं देखाई देत? ⁴जब तुम्हरेन आँखिन मां लट्टा है, तौ अपने भाई ते कैसे कहि सकत हौ कि लाउ तुम्हरी आँखि ते तिनका निकार देई। ⁵अरे कपटी, पहिले अपन आँखि ते लट्टा निकालि लेई, अपने भाई केर आँखि क तिनका अच्छी तिना देखि कै निकारि पइहौ।

⁶पवित्र सामान क कुकूर क न देउ, अउर अपने मोती सूअरनि के आगे न डारौ। ऐस न होय कि उई उनकौ पावन तरे रौदे अउर पलटि कै तुम्हकौ काटि डारै।

मांगना, खोजना अउर खटखटाना

⁷मांगेउ, तौ तुमहुक दीन जाई दूढ़ी, तौ तुम पइहौ, खटखटान, तौ तुम्हरे खातिर खोला जाई।⁸काहे ते जो कोई मांगत है, उहिका मिलति है। अउर जउन

दूढ़ति है, तउन पावति है, अउर जउनु खटखटावत है उहिके खातिर खोला जाई।

⁹तुममें ते ऐसि कउन मनइ है, कि अगर उहिका लरिका उहिते रोटी मांगे तौ वहु उहिका पाथर देई? ¹⁰अउर मछरी मांगे तौ वहु उहिका साँप देई? ¹¹यहिते जबे तुम बुरे होइके, अपनि संतानौ का नीक सामानन देन जानत है तौ तुम्हार सरग मा रहै वाला बापू अपनि मांगे वालेन कय नीक सामाने काहे न देई? ¹²इहि कारन जउन तुम चाहत हौ कि मनइ तुम्हरेउ साथ करै, तुमहूँ वहिके साथ वइसने करौ, काहे ते विवस्था अउर नबी लोगन केर सिच्छा यहै है।

साकर अउर चाकल रस्तवा

¹³सकरे फाटक ते घुसौ काहे ते वहु चौड़ा है, ऊ फाटक, अउर चाकल है। ऊ रस्ता जउन विनास कइहन पहुंचावत है। अउर बहुतेरे हैं जउन वहिते परिवेस करत हैं। ¹⁴काहे ते मारग अउर सकरा है, ऊ फाटक, अउर सकरा है ऊ मारग जउन जिन्दगी का पहुंचावत है अउर बहुत कम है जउन उहिका पावत है।

विरवा अउर वहिके फल

¹⁵झूठे ते बचेई रहै। जउन भेडन के भेस मा तुम्हरेउ पास आवत है। मुला भीतर ते फारिबेबारे भेडिया हैं। ¹⁶उन्हन के लोग फलन ते तुमहूँ उनका पहिचान लै हौं, का झाड़िन ते अंगूर, अउर ऊँट कटारन ते अंजीर तोरित हैं? ¹⁷यहि तिना हर एकु निक बिरवा निक फलु लावत हैं अउर बुरौ बिरवा बुरा फलु लावत हैं। ¹⁸अच्छा पेडु बुरा फलु नाहि लाई सकत हइ, अउर न बुरा बिरवा अच्छा फल लाई सकत हइ। ¹⁹जउन बिरवा अच्छा फल नाहीं लावत है, ऊ काटि कै आग मा डारा जात है। ²⁰यहिते तुइ उहकेर फलन ते उनहुक पहिचानि लेहौ।

²¹जउन हमते हे परभु, हे परभु, कहत है, उनहिन मा ते हर एकु सरग क राज म परिवेस नाहिं करिहें, मुला उहै जउन हमार सरग मा रहै वाले बापू केर इच्छा पै चलत है। ²²उइ दिन बहुते लोग हमते कहि हैं कि परभु, हे परभु, का हम तुम्हरे नाम ते भविसयवानी नाहीं कीन, अउर का तुम्हरे नाम ते बुरी आतमन् क नाहीं निकारेन अउर तुम्हरे नाव ते बड़े बड़े अचरज भरे काम नाहीं कियेन? ²³तबै हम उनते खुलि कै कहि देव कि हम तुम्ह का कबहू नाहीं जाना, हे कुकरम करै वाले, हमरे तीर ते चले जाव।

बुद्धिमान अउर मूर्ख केर मिसाल

²⁴यहिते जउन कोउ हमरि ई बातन क सुनिकै उनका मानत है, ऊ बुद्धिमान मनइ केर नाई ठहरी जउन आपन घर चट्टान पै बनाइसि। ²⁵अउर पानी बरसा, अउर बाढ़ि आवा अउर आँधी चली, अउर उई घर पै टक्करै लागी, मुला ऊ नाहीं गिरा काहे ते उहिकी नीव चट्टान पै डारी गई रहै। ²⁶मुला जउन कोऊ हमारु ई बात क सुनत है अउर ऊ पै नाहीं चलत है ऊ उई निर्बुद्धि मनइ केर नाई ठहरी जो आपन घर रेत पै बनाइस। ²⁷अउर पानी बरसा, अउर बाढ़ि आई, अउर अनेक आँधिन चली, अउर उई घर ते टक्करै लागी अउर ऊ गिरिकै नाँस होय गवा।

²⁸जबै यीसु ई बातन क कहि चुके तब ऐसन भवा कि भीड़ वहिके परवचन ते चकित हुई। ²⁹काहे ते उइ उन सास्त्रीन के समान नाहीं मुला अधिकारी केर नाँई उनहुक उपदेसु देत रहै।

एकु कोढ़िन कइहन चंगा करव

8जब ऊ उई पहार ते उतरा, तौ एकु भीड़ वहिके पाछे चली। ²अउर देखौ, कोढ़िन पास आइके उहिका परनाम किहिस अउर कहिस कि हे परभु! यदि तू चाहै, तौ मोहि ठीक करि सकत हौ।

³यीसु हाथ बढ़ाई कै उहिका छूइसि अउर कहिस, हम चाहित हैं तुइ ठीक होई जाव अउर ऊ तुरन्तै कोढ़ ते ठीक होइ गवा। ⁴यीसु उहिते कहिन देखउ, ई बात कोऊ ते न कहेउ, अउर जायके अपने आपकू याजक कइ दिखाई कै अउर जउन चढ़ावा मूसा ठहराइन है, तउन उहिका चढ़ाउ, जेहिते उनहुन के बरे गवाही होय।

अधिकारी केर बिसवासु

⁵जबइ ऊ कफरनहूम मा आवा तउ एकु सूबेदार आइके वहिते बिनती किहिस। ⁶कि हे परभु! हमार सेवक घरका झोले क (लकवा) के मार ते बहुते दुखी परा है।

⁷ऊ उइते कहिसि हम आइके उहिका चंगा करिबे।

⁸सूबेदार उत्तर दिहिस कि हे परभु, हम ई लायक नाहिन कि तुई हमरी छत केर नीचे आवउ, खाली मुंह ते कह देऊ तउ हमारु सेवकु चंगा होई जाई।

⁹काहे ते हमहू दूसरे के पराधीन मनइ हूँ, अउर सिपाही हमरे हाथ मा है। अउर जब एकु ते कहिस है जाउ, तौ जात है; अउर दूसरे ते आउ कहित है तउ ऊ आवत है।

¹⁰ई सुनि कै यीसु के अचम्भा किहिस अउर जउन

वहिके पीछे पीछे आवत रहै, उनहुन ते कहिन; हम तुमते साँचि कहित है कि हम इसराएल मा हन ऐसु बिसवासु नाहीं पायेन। ¹¹हम तुम ते इहउ कहित है कि बहुतेरे लोग पूरब अउर पच्छिम ते आइके अबराम अउर इसहाक अउर याकूब के साथ सरग के राज में बैइठि हैं। ¹²मुला राज केर सन्ताने अधियारे मा डारि दीन जइहैं; उहां रोउब अउर बाहर ई दांतु पीसबु होई।

¹³तबै यीसु सूबेदार ते कहिन, जाव जइस तोहार बिसवासु है, वेसेई तुम्हरे खातिर होइ। सेवकु उहि घरी चंगा होइगा।

यीसु बहुतन केर चंगा करिन

¹⁴अउर यीसु पतरस के घर मा आइके उहिकी सासु कय बुखार मा परी देखिसि। ¹⁵उइ उहिका हाथ छुइन अउर उहिका बुखार उतरि गवा; अउर ऊ उठि कै उहिकी सेवा करई लागी। जब इ साँझि भई तब उइ उहिके नेरे बहुते लोगन क लै आये, जिनमा दुस्त आतमाएँ रही,

¹⁶अउर ऊ उइ दुस्त आतमनन क अपन बचन ते निकारि दिहिन, अउर सबै बीमारन क चंगउ करि दिहिन। ¹⁷ताकि जउन बचनु यसायाह भविसवकता ते कहिन रहै ऊ पूरा होय, ऊ खुदै हमरी दुरबलतन क लै लिहिस अउर हमरी सबै विमारिन का उठाय लिहिस।

यीसु केर चेलवा बने केर किमत

¹⁸यीसु अपने चारेउ ओर एकु बड़ी भीर देखि कै उई पार जाय खातिर आग्या दिहिन। ¹⁹अउर एकु सास्त्री नेरे आइके ऊ ते कहिस, हे गुरू, जहां कहुँ तुम जइहौ, हम तुम्हरे पाछे पाछे होइ लेबैं।

²⁰यीसु उइते कहिन, लोमडीन के मट्ट अउर आकास केर पच्छिन कै बसेरे होत हैं; मुला मनइन की सन्तान केर खातिर सिर धरै केर जगह नाही है।

²¹उइका एकु अउर चेली उहिते कहिस, हे परभु! हमका जाय देव जेहिते पहिलेइ अपने बापू का गाड़ि देई।

²²यीसु उइते कहिसि तुइ हमरे पीछे होई लेहू; अउर मुरदन क आपन आपन मुरदा गाडे देव।

यीसु तुफान केर सान्त करिन

²³जब ऊ नाव पै चढ़िस, तौ वहिके चेली वहिके पाछे होई लिहिन। ²⁴अउर देखउ, झीलै मां एकु ऐस बड़ो इ तूफान उठा कि नाव लहरन ते छिपै लागि, अउर वह सोवत रहा। ²⁵तब वै नेरे आइके ऊका

जगाइन, अउर कहिन हे परभु हमका बचाव, हम नासु हुई जाइत हैं।

²⁶ऊ उइते कहिस, हे अल्प विसवासी करै वालेउ काहे ते डेरात हो? तबे ऊ उठि कै आँधी अउर पानी क डाँटिन अउर सब सान्त होइगा।

²⁷अउर लोग अचरज करिके कहै लागि कि इ उ मनइ है। आँधी—पानी ऊकै कहा मानत है।

दुस्टआतमा ते भरे दुई मनइन केर चंगा किहिन

²⁸जब ऊ उई पार गदरेनियन केर देस मा पहुँचा तौ दुई मनइ जिनमा दुस्टआतमा रही कबरन ते निकरत भये ऊका मिले, जउन एतने उदंड रहे कि कउनौ उई मारग ते जाई नाही सकत हो। ²⁹अउर वै चिल्लाया के कहिन, हे परमेसुर केर लरिका, हमार तुम्हते का काम? का तुइ समय ते पहिले हमहिन क दुख देई इहाँ आये हो?

³⁰उनते कुछौ दूर पै बहुतन सुअरन केर एकु झुंड चरत रहे। ³¹दुस्टआतमान ने उइते ई कहि कै बिनती किहिन कि अगर तुई हमहक निकारत हो, तौ सुअरन के झुंड मा भेजि देव।

³²उइ उनते कहिसि जाव, उइ निकरि कै सुअरन मां पैठि गये, अउर देखौ सबही झुंड कड़ाके पै ते झट कै पानी मां जादू गिरा, अउर डूब मरा। ³³अउर चरवाहे भागे अउर नगर मां जाइके उइ ई सब बातन अउर जेहिमा दुस्टआत्मा रही उन्हे कौ सबै हालु सुनाइन। ³⁴अउर देखउ सबै नगर के लोगन यीसु ते भेट कइके निकसि आये अउर देखि कै बिनती कौन कि हमरे सिवानौ ते बाहर निकसि जाव

एकु लकवा केर रोगी कइहन चंगा

¹फिर ऊ नाव पर चढ़ि के पार गवा अउर अपन नगर मा आवा। ²अउर देखौ कइयों लोग एकु झोले केर मारे मनइ के खाट पै राखि कै उहिके नेरे लाये। यीसु उइके विसवासु देखि कै ऊ झोले केर मारे हुएन ते कहिन हे बिटवा ढाढ़स बांधौ तुम्हार पाप माफु होइ गये।

³अउर देखौ, कइयों सास्त्रियन सोचिन कि इउ तौ परमेसुर केर निन्दा करत है।

⁴यीसु उइके मनवा की बातन मालुम कै कहिन तुइ लोगन अपने मन मा बुरौ विचार काहे करते हो। ⁵सहजइ का है, ई कहब कि तुम्हार पाप माफु भवा, या ई कहव कि उठौ अउर चलो फिरउ। ⁶मुला ई या लये है कै तुम जान जाओ कि मनइ के लरिका क धरती पै पाप माफु करिबे कौ अधिकार है उइ लकवा

के मारे भवा मनइ ते कहिन “कै उठौ अउर अपनी खाट उठाय कै अपनि घरु चले जाउ”। ⁷अउर ऊ उठिके अपनि घर क चलि गवा। ⁸लोग ई देखिके डर गये अउर परमेसुर केर महिमा करै लाग जेहि मनइन क यीसु अधिकार दिहिस हइ।

मत्ती केर बुलावा

⁹उहाँ ते आगे बढ़िके यीसु एकु मत्ती नाव केर मनइ क महसूल केर चौकी पै बैइठा भवा देखिन अउर उइते कहिन, कि तू हमरे पाछे—पाछे होइ लेव। अउर ऊ उठिके वहिके पीछे होय लिहिस।

¹⁰अउर जब ऊ घरु म खाना खायक बइठा तौ बहुतेरे महसूल लेन वाले अउर पापी आइके यीसु अउर वहिके चेलन के साथ खाइ कै बैइटे। ¹¹ई देखि कै फरीसियन वहिके चेलन ते कहिन, कै तुम्हार गुरु महसूल लैबेबारे अउर पापीन केर साथ काहे खात है?

¹²ऊ ई सुनिके उनते उहितें कहिन, वैद्य भले चंगन क नाही मुला बीमारन क जरूरी होत है।

¹³सो तुम जायके ई केय मतलब मुला सीखि लेव कि हम बलिदान नाही दया चाहित हई। काहे ते हम धरमियन लोगन क नाही मुला पापिन क बुलावे आये हूँ।

यीसु सइहन उपवासु केर बारे मा परसन

¹⁴तब यहुन्ना क चेलन वहिके पास आयके कहिन कि का कारन है कि हम अउर फरीसी एतना उपवासु करत हैं, मुला तुम्हार चेले उपवासु नाही करत हैं।

¹⁵यीसु उनते कहिन का बराती, जब तक दूल्हा उइके साथ है, सोक करि सकत है? मुला उइ दिन आइहै जब दूल्हा उनते अलग किया जाई, उई बखत उई उपवासु करिहै।

¹⁶कोरे कपड़न के पैबन्द पुरान पहिरावन पै कोऊ नाही लगावत है। काहेते नया पैबन्द पहिरावन ते कुछ अउर खींच लेत है अउर ऊ अधिक फटि जात है।

¹⁷अउर नवा दाखरस (अंगूर केर सराब) पुरानी मसकन म नाही भरत है, काहे ते अइस किये ते पुरानह मसकै फटि जाति हैं अउर दाखरस बहि जात है, अउर मसकै नास होइ जात हैं। मुला नवा दाखरस नई मसकन म भरत हैं अउर ऊ दूनो बचिइ रहत हैं।

मृत लरकी अउर बीमार औरत नीक किहिन

¹⁸ऊ उइते ई बात करत रहे कि देखौ, एकु सरदार

आइके ऊका परनाम किहिस अउर कहिस, हमारि विटिया अबहिन मरी है। मगर चलिके अपन हाथ उहिके ऊपर रखिहौ तौ ऊ जिन्दा होई जाई।¹⁹यीसु उठि कै अपन चेलन के साथ पाछे होइ लिहिन।

²⁰अउर देखौ एक अउर स्त्री जिहिके बारह बरिसते लोहू बहत रहै वहिके पाछे ते आइके उइके कपड़ा क अंचरा क छुई लिहिस।²¹काहे ते ऊ अपन मन मा ई कहत रही कि अगर हम वहिके (यीसु के) कपड़ा का छुइ लेब तौ चंगी होई जावै।

²²यीसु मुड़ कै उइका देखिन, अउर कहिन, विटिया धीरज रखौ, तुम्हारु बिसवासु तुमकौ चंगा किहिस है, ऊ स्त्री चंगी होई गई।

²³जबै यीसु ऊ सरदारु केर घर मा पहुँचा, उहि बांसुरी बजावै वालेन अउर भीड़ क हल्ला गुल्ला करत भवा देखिस।²⁴ऊ उनते कहिय हटि जाओ, लरकी मरी नाई है, मुला सोवत है इह पै ऊ सबै हंसी करै लागे।²⁵जब भीड़, हटाय दीनी तौ वहु भीतर जायके लरकी केर हाथवा पकरिस, अउर ऊ जी उठिस।²⁶अउर ई बात केर चरचा उई सारे देस न म फैलि गई।

यीसु अंधे अउर गूगे कै चंगा किहिन

²⁷जबै यीसु उहाँते आगे बढ़ै, तौ दुई अंधे वहिके पाछे पाछे ई पुकारत भये चले, हे दाऊद केर सन्तान, हमरे ऊपर दया करौ।

²⁸जबै ऊ घर मा पहुँचा, तौ ऊ अनधरो उहिके पास आये; अउर यीसु उइते कहिन; कि का तुमका बिसवासु है, कि हम ई करि सकित है? उइ वहिते कहिन: हाँ परभु।

²⁹तबै उइकी आँखिन के छुइ केर कहिसि तुमरे बिसुवासु कै मुताबिक तुम्हरे खातिर होय।³⁰अउर उकी आँखी खुलि गयीं, अउर यीसु ऊका चेताइ कै कहिन — सावधान, कोऊ ई बात क न जानै।³¹मुला उइ निकरि के सारे देसन मा उहिके यस फैलाइ दिहिन।

³²जब उइ बाहिर जात रहै, तौ देखौ, लोग एक गूगे क जेहिमा दुस्टआतमा रही, वहिके पास लाये।³³अउर जबै दुस्टआतमा निकारि दीन, गई तौ गूगौ बोलै लाग; अउर भीड़ अचम्भा करि कै कहिस कि इसराएल मा कबहूँ अइस नाहीं देखा गवा।

³⁴मुला फरीसिन कहिन कि ई तौ दुस्टआतमा कै सरदारु केर सहायता ते दुस्टआतमान का निकारत होओ।

थोड़े मजूर

³⁵अउर यीसु सबै नगरन अउर सब गाँवन मां फिरत रहै अउर उनकी सभान मं उपदेस करत अउर राज के सुसमाचार परचार करत अउर हर तिना केर बीमारी अउर कमजोरी क दूर करत रहै।³⁶जबै उइ भीड़ क देखिन, तौ उन लोगन पै तरस आया, काहे ते उइ उन भेड़न केर नाई जिनके कउनो रखवार न होय, व्याकुल अउर भटके भवा जैस लागत रहै।³⁷तबै उइ अपन चेलन ते कहिन, पक्के खेत बहुत हैं मुला मजूर थोरेइ हैं।³⁸इहते कारन खेत केर मालिक ते बिनती करौ कै ऊ अपन खेत काटेक भेज देइ।

यीसु क बारह चेलन केर भेजब

10 फिर ऊ अपने बारह चेलवन का बुलाय कै उनहुन क असुद्ध आतमान प अधिकार दिहिन कि उनका निकारै, अउर सब तिना केर बीमारी अउर सब तिना के दुर्बलतन के दूर करै।

²उन बारह परेरितन के नाम है; पहिल समौन, जउन पतरत कहलावत है, अउर ऊ का भाई अन्द्रियास, जबदी केर लरिका याकूब, उहि केर भाई यहूना।³फिलिप्पुस अउर बर—तुल्मै थोमा, अउर महसूल लेन वाला मती, हल्फै केर लरिका याकूब अउर तद्दे; ⁴समौन कनानी, अउर यहूदा इस्करियोती, जउन उहिका पकड़िवायौ दिहिस।

⁵इन बारह जनन क यीसु कहि के भेजिन कि दूसरे धरमन क मानइ वालेन की ओर न जायेब अउर समरियन के कउनेउ नगर म न घुसेउ।⁶मुला इसराएल के घरानेइ केर खोई भई भेड़न केर पास जायेब।⁷चलत—चलत परचार करिकै कहेउ कि सरग का राज नेरे आइ गवा है।⁸बिमारन क चंगा करौ, मरै हुयेन क जियाव, कोढ़िन क सुद्ध करौ, दुस्टआतमान क निकारौ, सेतमेत पायेव है, सेतमेत देव।⁹अपने पटुका मा सोना न रुपया अउर न तांबा, रखेब।¹⁰मारग खातिर न झोली राखेउ, न दुइ कुरतो न दुइ जूतौ अउर न लाठी लेव, काहे ते मजूरन क उनके भोजन मिलय क चाही।

¹¹जउने नगर, गांउं मा जाव, पता लगाव कि हुवां कउन काबिल है? अउर जब तक उहां ते न निकरौ, वहिके हियां रहौ।¹²अउर वहिके घर मा परवेस करत भवा ऊ का आसीस देव।¹³अगर उई घर के लोगन ई काबिल होइहैं तौ तुम्हार कलियानु उन पै पहुँची, अगर उइ ई काबिल न होय तौ तुम्हार कलियानु तुम्हरेइ पास लौटि आयी।¹⁴अउर जउन कोई तुमका

बात न सुनै, अउर तुम्हें गरहन न करै, तौ उई घर या उई नगर ते निकरत भवा अपन पैरन केर धूरि झारि डारेव।¹⁵हम तुमते साँची कहित हैं कि नियायु केर दिन उई नगर केर दसा ते सदोम अउर अमोरा केर देस केर दसा बहुतै सहै लायक होई।¹⁶देखौ, हम तुमका भेड़न केर नाई भेड़ियन केर बीच म भेजित हैं इहिते सांपन केर नाई बुधिमान अउर कबूतरन केर नाई भोलई बनौ।

¹⁷मुला लोगन ते सावधान रहौ, काहे ते उइ तुमहुक महासभान म सौपि हैं, अउर अपन पंचायतन मं तुमका कोड़ा मरि हैं।¹⁸तुम हमरी खातिर हाकिमन अउर राजन के समूहे उनपै, अउर अन्य जातीन पै गवाही खातिर पहुंच जायेउ।¹⁹जब तुमका पकरिवावै तौ ई चिन्ता न करेव, कि हम केहि रीति ते या का कहिबै; काहे ते जउन तुमका कहै क होई ऊ तुमका वही घरी बताय दीन जाई।²⁰काहे ते बोले वाले तुम नाहीं हौ। मुला तुम्हरे बापू की आतमा तुम्हरे मा बोलित है।

²¹भाई, भाई क अउर बाप—लरिका क, घात खातिर सौपि हैं, अउर लरिकेवाले महतारी—बाप क खिलाफ मां उठिकें मरिउइका डारि हैं।²²हमरे नांव के खातिर सबै लोग तुमते बैरु करिहैं। मुला जउन आखिर तक धीरज धरिहैं वहिका उद्धार होई।²³जब उई तुमका एकु नगर मा सतावैं, तौ, तुम दूसरे नगर क भागि जायो। हम तुमते साँची कहित हैं तुम इसराएल के सब नगरन में नाहीं फिर चुकिहौ कि मनइ क लरिका आइ जाई।

²⁴चेला अपने गुरु ते बड़ा नाहीं होत है; अउर न दास अपन मालिक ते।²⁵चेला क गुरु के, अउर दास क मालिक के बराबर होनाँ ही बहुत है। जब उइ घर के मालिक क सैतान कहैं, तौ वहिके घर बारेन क का कहिहैं?

²⁶तउन तुइ उनते डरेव। काहे ते कछु ढपा नाहीं है, जउन खोला न जाई।²⁷हम तुमते जउन कछु अंधियारे म कहित हैं उइका तुम उजेर मां कहौ, अउर जउन कानौ—कान सुनत है वहिका कोठन पै ते चढिकें परचार करौ।²⁸जउन सरीर क घात करै हैं, मुला आतमान क घात नाहीं करि सकैं, उन्ते मत डरिहौ, मुला उइते डराव जउन, आतमा अउर सरीर दुनव क नरक मां नासि कइ सकत है।²⁹का पइसा मा दुई गौरइया नाहीं बिकत? तौऊ तुम्हार बापू केर इच्छा केर बिना उइमा ते एकौ धरती पै नाहीं गिरि सकत है।³⁰तुम्हरे सिर कै बारौ गिने भये हैं।³¹एहिते डेराव नाहीं। तुम बहुतै गौरयन ते बढिकै हौ।

³²जउन कोई मनइन केर सामने हमका मानि लेई ऊ का हमहू अपने सरग मा रहै वाले बापू के सामने मान लेबैं।³³मुला जउन कउनो मनइन के सामने हमार इनकार करिहैं उइका हमहू अपन सरग मा रहै वाले बापू केर सामने इन्कार करबे।

³⁴ई न समझौ, कि हम धरती पे मिलाय कराये का आयेन हैं। हम मिलाप करावै का नाहीं मुला तलवारु चलावै आयेन हैं।³⁵हम तौ आयेन हैं, कि मनइन का वहिके बापू ते, अउर बेटी क उहिकी महतारी ते, अउर बहुरिया क उहिकी सासु ते अलगि करि देई।³⁶मनइ के बैरी तौ वहिके घरई के लोग होइ हैं।

³⁷जउन महतारी—बापू क हमते ज्यादा पिरय जानत हैं, ऊ हमरे लाये नाहीं,³⁸अउर जउन अपन सूली लैके हमरे पाछे न चलै ऊ हमरे लायक नाहीं।³⁹जउन अपन परान बचावत है, ऊ उइका खोयी; अउर जउन हमरे कारन अपन परान खोवत है, ऊ उइका पाइहै।

⁴⁰जउन तुम्हका गरहन करत है, ऊ हमहुक गरहन करत हैं, अउर जउन हमका गरहन करत है, ऊ हमरे भेजबेबारे क गरहन करत है।⁴¹जउन नबी क नबी जानि कै गरहन करै, ऊ नबी क बदला पाई⁴²जउन कोई इन छोटन मा ते एकु क चेला जानि कै खाली एक कटोरा ठंडा पानी पियावै, हम तुमते सांचु कहित हैं, कि कउनऊ रीति ते आपन परतिफल न खोई।

यीसु अउर यहुन्ना बपतिसमा दाता

11 जब यीसु आपन बारह चेलन केर आग्या दै चुकै, तौ ऊ उनके नगरन में उपदेसु अउर परचार के बरे उहां ते चलि गवा।

²यहुन्ना कैदखाने म मसीह क कामन का समाचार सुनि कै आपन चेलन क उहिते ई पूछिबे भेजउन।³कि का आइबेबारौ तूई है, या हम दूसरे केर बाट जउनहैं?

⁴यीसु ने जवाबु दियौ, कै जउन कछु तुम सुन रहे हौ, अउर देखि रहे हौ, ऊ सब जायके यहुन्ना ते कहि देऊ।⁵अन्धे देखैं हैं, अउर लंगड़े चलै फिरैं हैं; कोढ़ी सुद्ध करे जात हैं अउर बैहरे सुनिवे लगे हैं, मुर्दे जिन्दे कियै जाबे हैं; अउर कंगालन क सुसमाचार सुनायौ जावै है।⁶धन्य हैं वो जउन हमरे कारन टोकर नाहीं खावै।

⁷जब बे उहां ते चलि दिये, तौ यीसु यहुन्ना के बारे में लोगन ते कहन लागि; तुम जंगल में का देखई गये रहन? का हवा ते हिलते भवा सरकडेन क? ⁸फिर तुम का देखै गये रहेव? का मुलायम कपड़ा

पहिने भवा मनइन का? देखौ, जउन मुलायम कपड़ा पहिनत हैं, उइ राज महलन म रहत हैं।⁹तौ फिर काहे गये रहेव? का कउनव भबिसवकता का देखे? हो हम तुमते कहित है कि भबिसवकता ते बड़के हौ।¹⁰ई वहै है जिनके बारे म लिखा है, कि देखौ; हम अपने दूत क तुम्हरे आगे भेजित हैं, जउन तुम्हरे आगे तुम्हार रास्ता तैय्यार करिहैं।

¹¹हम तुमते सांचु कहित हैं कि जउन मेहरारु ते जनमें हैं, उनमें ते यहुन्ना बपतिसमा देई वाले ते कउनव बड़ा नाही भवा मुला जउन सरग के राज म छोट ते छोट हइ ऊ उइते बड़ौ है।¹²यहुन्ना बपतिसमा देबेवालेन के दिनन ते अबहीं तक सरग के राज पै जोर होत रहा है, अउर बलवान ऊका छीन लेति हैं।¹³यहुन्ना तक सारे भबिसवकता अउर बेयवसथा अउर भबिसयवानी करत रहे।¹⁴अउर चाहौ तो मानो, एलिय्याह जउन आये के रहै, ऊ इहय है।¹⁵जेहिके सुनै क कान होय, ऊ सुनि लेई।

¹⁶हम ई समय के लोगन केर उपमा केहि ते देई? वै उन लरिकन कि नाई हैं। जउन बाजारन म बैठे भवा एकु दूसरेन ते पुकारिकें कहत हैं।

¹⁷कि हम तुम्हार बदे बाँसुयी बजायेन, अउर तुम नाही नाचे; हम विलाप कियेन, अउर तुम छाती नाहि पीटेउ।

¹⁸काहे ते यहुन्ना न तौ खाति आवा, न पियत आवा। अउर वय कहित हैं, कि उहिमा दुस्तआतमा है।¹⁹मनइ केर लरिका खात—पियत आवा, अउर कहित हैं, कि देखौ, पेटू अउर पियक्कर, मनइ, महसूल लेबे वालेन अउर पाप करै वालेन क साथी, मगर गियान तौ अपन कामन ते, सच्चा ठहरावा गवा है।

न पछतावे वालन नगरन को धितकारन

²⁰तब ऊ उन नगरन क उलाहना देई लाग, जेहिमा उइ बहुतेरे सामरथ के काम करत रहै; काहे ते उइ अपन मन नाही बदलिन रहै।²¹हाय, खुराजीन; हाय, बैतसैदा; जउन सामरथ केर काम तुममा कीन गये, अगर सूर अउर सैदा म कीन जेहिसे, तौ टाटु ओढ़ि कै अउर राखी म बइठ कै उइ कबहिन कै मन फिराय लेते।²²मुला हम तुमते कहित हैं कि नियाउ केर दिन तुम्हरी दसा ते सूर अउर सैदा केर दसा अधिक सहै लायक होई।²³अउर हे कफरनहूम, का तुई सरग तक ऊँचे किया जाई, तुम तौ अधोलोकइ तक नीचे जइहौ, जउन सामरथ के काम तुइमा किये गये हैं, अगर सदोम म किये जात, तौ ऊ आज तक

बना रहत।²⁴हम तुइते कहित हैं, कि नियाउ के दिना तुम्हरी दसा म सदोम कै देस केर दसा अधिकै सहै जोग है।

उद्धार केर मिला न्योता

²⁵उही समय यीसु कहिन, हे बापू, असमान अउर धरती केर परभु। हम तुम्हार धन्यवादु करित हैं कि तुइ ई बतियन का ग्यानियन अउर समझदारन ते छिपाय राखेउ अउर लरिकन पै परकट कियो।²⁶हौ, हे बापू! काहे ते तुइका इहे नीक लाग।

²⁷हमार बापू हमका सबै कुछ सौंपिन है अउर कउनेउ लरिका क नाही जानत, खाली बापू; अउर कउनेउ बापू केर नाही जानत, खाली लरिका; अउर ऊ जेहि पै लरिका उइका परगट करै क चाहै।

²⁸हे सबै मेहनत करै वालेउ अउर बोझ ते दबे भये मनइ हमरे पास आवउ, हम तुमका विसराम देवैं।²⁹हमार जुआ अपने ऊपर उठाइ लेव; अउर हमते सीखो; काहे ते हम नरम अउर मन कौ दीन अउर तुम अपन मन मा विसराम पइहौ।³⁰काहे ते हमार जुआ असान अउर हमार बोझ हलुक है।

यीसु सबत केर परभु

12 उइ समय यीसु सबत के दिन खेतन मा ते होइकै जाइ रहै, अउर वहिके चलन का भूख लगि, तउन उइ बालि तूरिके खाय लागे।²फरीसियन ई देखि कै यीसु ते कहिन देखव तुम्हार चेलेउ ऊ काम करि रहे हैं; जउन सबत के दिन करव उचित नाही है।

³उइ उनते कहिन का तुम नाही पढ़ेव, कि दाऊद जबै अउर वहिके साथी भूखे भवा तौ का किहिन?⁴ऊ काहे का परमेसुर केर घर मा गवा अउर भेंट केर रोटी खाईव ईनकौ खाव न तौ उइका अउर न वहिके साथिन क खाली याजकन कै खातिर उचित रहै?⁵या तुइ बेयवसथा म नाही पढ़ेव, कि याजक सबत के दिन मंदिर मा सबत कै दिन केर नियमु केर तोड़ै पै निरदोस ठहरत हैं।⁶मगर हम तुमते कहत हूँ, कि यहाँ ऊ है जउन मंदिर ते बड़ौ है।⁷यदि तुम ई जानत हौ कि हम दया ते परसन हन, बलिदान ते नाही तौ तुम निरदोस क दोसी नाही ठहरउतेउ।⁸मनइ क लरिका तौ सबत के दिनु उकै परभु है।

⁹उहाँ ते चलिक्के ऊके सभा केर घर मा आवा।¹⁰अउर उनहुन उइ पै दोस लगावैक लये उहिते पूछिन कि का सबत केर दिना चंगा कै उचित है?

¹¹ऊ उइते कहिस, तुमरेय अइस कउनु है, जेहिनी

एक भेड़ होय, अउर ऊ सबत कै दिन गढ़े मा गिर जाय, तौ ऊ उइका पकड़ि कै न निकरिहै? ¹²भला, मनइ केर किमत भेड़न ते कितना बढ़ि कै है? एहि कारन सबत के दिन भलाई करेब उचितइ है। तब ऊ उई मनइ ते कहिसि, — “अपन हाथ बढ़ाउ”।

¹³उइ हाथ आगे बढ़ाय दिहिस अउर ऊ दूसरे हाथ की नाई अच्छा होइ गवा। ¹⁴तब फरीसिन बाहर जाइकै यीसु केर खिलाफ मां सम्मति किहिन कि ऊ केहि तिना नास कीन जाय?

परमेशुर केर चुना भवा दास

¹⁵ई जानि कै यीसु उहां ते चले गये। अउर बहुते लोग वहिके पीछे होइ लिहिन, अउर ऊ सबका चंगा किहिस। ¹⁶अउर उनहु चेताइस कि हमका परगट मत करेव। ¹⁷काहे ते जउन बचन यसायाह भविसवकता ने कह्यौ हतो ऊ पूरौ हो।

¹⁸काहे ते देखौ, ई हमार सेवक है, जिन्हका हम चुनेन है, हमार पिरय, जेहिसे हमारु मन परसन है, हम अपन आतमा के ऊकै ऊपर डारबे, अउर ऊ अन्य जातिन क नियाउ केर समाचार देयी।

¹⁹ऊ न झगड़ा करी अउर न धूम मचाई, अउर न बजारन म कोऊ उहिका सबद सुनाई परी।

²⁰ऊ कुचले भयेन सरकंडे का न तूरी अउर धुआं देत भई बतिन का न बुझाई। जब तलक नियाउ क परबल न करावै।

²¹अउर दूसर धरम क मनइ वाले वहिके नामु पै आस रखिहै।

यीसु केर सवित

²²तब लोग एक अन्धे गूगे का जेहिमा दुस्टआतमा रही वहिके पास लाये; अउर उहिका उइ अच्छा किहिस। ऊ गूगौ बोलै अउर देखै लाग। ²³ई पै सब लोग अचम्भौ करके कहवे लगे, कि ई का दाऊद केर सन्तान कौ है।

²⁴मुला फरीसीन ने यह सब सुनिके कहिन ई दुस्टआतमान के सरदार “सैतान” केर सहायता केर बिना दुस्टआतमान क नाहीं निकार सकै।

²⁵उइ उनकेर मन केर बात जानिके उन्ते कहिन, जा कऊन राज म फूट होय है, ऊ उजड़ जाति हैं अउर कोऊ नगर या घराना मा फूट होत है, ऊ उजड़ जात है? ²⁶अउर अगर “सैतान” ही सैतान केर निकारै तौ ऊ अपनेइ ही खिलाफ होई गवा है; फिर ऊकै राज काहे ते बना रहिहै? ²⁷अउर अगर, हम सैतान केर सहायता ते दुस्टआतमा क निकारित हैं, तौ तुम्हारे

बंस केहिकी केर सहायता ते निकारत है? जेहिसे उई तुम्हार नियाउ चुकहै। ²⁸लेकिन अगर हम परमेशुर कि आतमा कि मदद से दुस्टआतमा क निकारित हैं तो परमेशुर क राजु तुम्हरे नेरे आइ पहुंचेउ।

²⁹यां कहे क कउनउ मनइ कउनउ बलवान मनइ क घर घुसि कै उहिका मालु कौनी तरह लुटि सकत हैं जब तक कि पहिले उइ मनइ क न बाधि लेई अउर तबै ऊ उइका घर लूट लेई।

³⁰जउन हमरे साथ नाहीं है; ऊ हमरे खिलाफ मां है; अउर जउन हमरे साथ नांय बटोरत ऊ बिथरात है। ³¹यहिते हम तुमते कहत हन, कि मनइ का सब तिना का पाप अउर निन्दा माफु करी जायगी, पर आतमा केर निन्दा माफु नाहीं करी जायगी। ³²जउन कोऊ मनइ के लरिका केर खिलाफ में कउनउ बात करिहै, उहिका ई अपराध तौ माफु कीन जाई मुला जउन कोऊ पवितर आतमा केर खिलाफ मं कुछ कहिन, उहिका अपराध न तौ ई लोक म अउर न परलोक मं माफु कीन जाई।

³³जहि बिरवा क नीक कहौ, तौ वहिके फलु क नीक कहौ; या बिरवा क निकम्माउ कहौ, तौ वहिके फलु क निकम्मा कहउ, काहे ते बिरवा फलई ते पहिचाना जात है। ³⁴हे सांप केर बच्चों तुम बुरे होइकै कहिते नीक बतियां करि सकत हौ? काहे ते जउन मन म भरा है, वहै मुह पै आवत है। ³⁵भला, मनइ मन के भलई भन्डारु ते भली बातन क निकारै है; अउर बुरौ मनइ बुरे भंडार ते बुरी बातन क निकारत है। ³⁶हम तुमते कहित हई, कि जउन जउन निकम्मी बातें मनइ कहि हैं नियाउ के दिन हर एकु बात क लेखा जोखा देत हैं। ³⁷काहे ते तुई अपन बातन के कारन निरदोस अउर अपनी बातन के कारन दोसी ठहराये जई हैं।

योना केर चिन्ह

³⁸ई पै केतनै सास्तरिन अउर फरीसीन उहिते कहिन, हे गुरु, हम तुमते एकु चिन्ह द्याखन चाहित हई।

³⁹उइ बिन्ते कहिन, कि ई जुग केर बुरेइ अउर वेभिचारी लोगइ चिन्ह दूढ़त हैं, मुला यूनस भविसवकता के चिन्ह क छोड़िके कोऊ अउर चिन्ह उइका नाहीं दीन जाई। ⁴⁰यूनस तीन रात दिन जल—जन्तू केर पेट म रहा, वैसेई मनइ का लरिका तीन रात दिन तलक धरती के भीतर रहिहै। ⁴¹नीनवे के लोगउ नियाउ केर दिनई ई जुग केर लोगन केर साथ उठि कै उनहुक दोसी ठहरइहै, काहे ते उननं यूनस क

परचार सुनिकै, मनु फिराइन अउर देखौ, इहां ऊ है जउन युनुस ते बड़ा है।⁴²दक्खिन केर रानी नियाउ केर दिन ई जुग केर लोगन केर साथे उठिके उइके दोसी ठहरइहै, काहे ते उइ सुलैमान के ग्यान सुनई केर खातिर धरती केर छोर ते आई। अउर देखउ हियां ऊ है जउन सुलैमान ते बड़ो है।

⁴³जब असुद्ध आतमा मनइ मा ते निकरि जाति हैं, तौ सूखी जगहन मा विसराम दूढ़ति फिरती है, अउर जबे नाही पावत है।⁴⁴तबे ऊ कहत है, कि हम अपनी घर मं ते जहां निकरेन रहै, लौटि जैहउं। अउर आइके ऊका सूना, झाड़ौ बहारा अउर सजा-सजावा पावति है।⁴⁵तबे ऊ जायके अपनि ते अउर बुरी सात आतमान क अपने साथ लै आई। अउर ऊ उइमा बइठि कै उहां बास करति हैं, अउर उई मनइ केर दसा पहिले की दसा पहिले ते अउर बुरी हुइ जात है; ई जुग के बुरे लोगन केर दसा ऐसी ही होयी।

यीसु केर महतारी अउर भाई

⁴⁶जबई उइ भीड़ ते बातें करते रहै तबई उहिकी महतारी अउर भाई बाहर खड़े रहै। अउर उहिते बातें करै क चाहत रहे।⁴⁷कोऊ उनते कहिसि, देखौ तुम्हार महतारी अउर तुम्हार भाई बाहर खड़े हैं; अउर तुमते बातें करै क चाहत हैं।

⁴⁸ई सुनिकै ऊ कहै वाले क जवाबु दिहिस, कउनु है हमार महतारी? अउर कउनु है हमार भाई?

⁴⁹अउर अपने चेलन कि ओर अपन हाथु बढ़ाय कै कहिसि, देखौ; हमार महतारी अउर भाई ई है।⁵⁰काहे ते जउन कउनेउ हमरे सरग मा रहै वाला बापू केर इच्छा पै चलै वहै, हमार भाई बहिन, अउर महतारी है।

बीज बोनेवाले केर मिसाल

13 उइ दिन यीसु घर ते निकरि कै झील के किनारे जाइ बैठे।²अउर वहिके जउरे अइस बड़ी भीड़ जमा भई कि ऊ नाव पै चढ़ि गवा; अउर सारी भीड़ किनारे पै ठाड़ी रही।³अउर ऊ उइते उदाहरन मा ढेर सारी बातें कहिस। ऊ कहिसि एकु बोबै वाला बिया बोबै क निकरा है।⁴बीज बोवत समय कछु बीज रास्ता केर किनारेन पै गिरि गये अउर पंछी आयके उनका चुगि लिहिस।⁵थोरे पथरीली धरती पै गिरे, जहां उइका माटी नाहीं मिली अउर गहरी माटी न मिलै के कारन बे हालि ते उगि आये।⁶मुला सूरज निकरै प उई जरि गये, अउर जड़न क न पकरै ते उई सूखाइगे।⁷थोड़े झारिन मा गिरिगे,

अउर झारिन बढिकै उनहुक दवाई डारिन।⁸मुला थोर नीक धरती पै गिरे, अउर फलौ लाये, कउनु सौ गुना, कउनु साठ गुना, कउनु तीस गुना।⁹जेहिके कान होय ऊ सुनि लेई।

¹⁰अउर चेलन नेरे आय कै उहिते कहिन, तू उन्ते उदाहरन म काहे बात करत हउ?

¹¹उइ जवाबु दिहिस, कि तुम क सरग के राज के भेदन केर समझि दई गई है, पर उनका नाहीं।¹²काहे ते जाहि के पास है, उ कौ दीन जाई, अउर वहिके पास बहुत होई जाई, पर जिनके पास कछु नाहीं उहिते जउन कछु वहिके पास रहै, वहु लै लीन जाई।¹³हम उन्ते उदाहरनन म यहि कारन बातें करित हैं कि उइ देखत भये नाहीं देखें, अउर सुनत भये नाहीं सुनत हैं; अउर नाहीं समझति।

¹⁴अउर उइके बारे मं यसायाह केर ई भबिसवानी पूरी होत है, कि तुम कानन ते तौ सुनत हो, पर समझिहौ नाहीं, अउर आंखन ते तौ देखिहौ मुला तुमका ना सूझी।

¹⁵काहे ते इन लोगन का मन मोटाय गवा है, अउर उई कानन ते ऊंचा सुनत हैं।

अउर उई आपन आंखिन क मूदि लिहिन हैं, कबहूँ ऐस न होय कि उई आंखिन ते देखें,

अउर काने ते सुने,

अउर मन ते समझें,

अउर फिर जाएं,

अउर हम उनका चंगा करी।

¹⁶मुला धन्य है तुम्हारि आंखियां कि उइ देखति हैं, अउर तुम्हार कान जउन सुनत है।¹⁷काहे ते हम तुमते सांची कहित है कि बहुतै नबी अउर धर्मियन चाहिन कि जउन बातन का तुम देखत हो, देखि कै, न देखीं; अउर जउन उहितें तुम सुनत हो, सुनौ, प न सुनी।

¹⁸सो तुम बोइबेवाले कै उदाहरन सुनौ।¹⁹जोउ कउनु राज कै बचन सुनिकै नाहीं समझत, वहिके मन मा जउन कछु बोवा गवा रहा उइका ऊ दुस्त आइके छीन लै जात है। ई ऊ है जउन रस्ता केर किनारे बोवा गवा रहै।²⁰अउर जउन पथरीली धरती पै बोवा गवा, ऊ ई है, जउन बचन सुनिके तुरन्त खुसी ते मान ले है।²¹पर अपने मं जड़ न पकड़ै के कारन ऊ थोरेई दिनन क है, अउर जब बचन के कारन क्लेस या उपदरउ होवत है, तो तुरन्त टोकर खाति है।²²जउन झाड़ीन मां बोवा गवा है ई ऊ है, जउन बचन क सुनत है, मुला ई दुनियां केर चिन्ता अउर धन क धोखा बचन क दबावत है, अउर ऊ फल नाहीं लावत।²³जउन नीक धरती मं बोवा गवा,

ऊ ई है जउन बचनु का सुनि कै समझत है, अउर फलु लावत है, कउनऊ सउ गुना, कउनव साठ गुना, अउर कउनऊ तीस गुना।

जंगली बीजों केर मिसाल

²⁴उइ उनका एक उदाहरन अउर दियो कि सरग क नगर बा मनइ के समान है जाने अपुने खेत में अच्छी बीज बोयो। ²⁵मुला जब लोग सोय रहे हते तौ उहिका दुस्मन आयके गेहून के बीच जंगली बीज बोयके चली गवा। ²⁶जब बीज में अंकुर फूटे अउर बाले लगीं, तौ जंगली दानेऊ दिखाई देवे लगे।

²⁷ई पै मालिक के सेवकन ने आयके उहिते कहिन, हे मालिक, का तैने अपुने खेत में अच्छी बीज नाही बोयो? फिर जंगली दाने के पौधे बामें कहाँ ते आये?

²⁸उइ उन्ते कहिन, ई तौ काऊ बैरी कौ काम है, सेवकन ने उहिते कहिन, अब तुम्हारी का इच्छा है, का हम उनक बटउर लायें?

²⁹ऊ कहिन, कहूँ ऐसौ नांय होय कि जंगली दाने के पौधान क बटउरते भवा उनके साथ गेहूँ कौ पौधा हूँ न उखरि जाय। ³⁰कटनी के समै तक दोऊन क एक साथ बढ़न देऊ, अउर काटिबे के समै काटिबेबारेन ते कहूँगे, कि पहिले जंगली दाने के पौधान क बटोरिके जराइवे के ताई उनके गटर बांध ल्यो, अउर गेहून क हमरे खलिहान में यकट्टी करौ।

राई केर बीज अउर खमीर केर मिसाल

³¹उइ उनका एक अउर उदाहरनु सुनाइसि, कि सरग कै नगर राई के एक दाने कै नाई है, जेहिका कउनव मनइ लैके अपने खेत म बोई दिहिस। ³²ऊ सब बीजन ते छोटउ है मुला जब ऊ बढ़ि जात है तौ सबै सागपातन ते बड़ा होत है। अउर ऐसइ बिरवा होइति है कि आकस कै पच्छीव आइके उइको डारिन पे बसेरु करत है।

³³उइ एक अउर उदाहरन उइका सुनाइसि कि सरग का नगर खमीर केर समान है, जेहिका कउनव औरत लै के तीन पसेरी आंटा म मिलाय दिहिस, अउर होत—होत सब खमीर होई गवा।

³⁴ई सबै बातें उदाहरन मा यीसु सबै ते कहिन, अउर बिना उदाहरन के ऊ उन्ते कछु नाही कहत रहै। ³⁵अउर जउन बचन भविसवकता ते कहयो गवा, ऊ पूरा होय कि हम उदाहरन कहबै अपन मुंह खोलिस; अउर उन बातन क जउन जगत केर उत्पत्ति ते गुपत रही परगट करिहैं।

जंगली बीज केर उदाहरन

³⁶ऊ भीड़ ते उठिके घर में आय गवा, अउर वहिके चलन वहिके ढिगा आयके कहिन, कि हमें खेत के जंगली दानेन बारौ उदाहरन अच्छी तरियां ते समझाय देइ।

³⁷ऊ उइका उत्तर दिहिस, कि नीकु बीजु क बोवै वाला मनइक कै लरिका है। ³⁸खेत संसारिक है, अच्छी बीज नगर केर सन्तान, अउर जंगली बीज दुस्मन केर सन्तान है। ³⁹जउन बैरी उइका बोइसि ऊ सैतानु है, अउर कटनी संसार क अन्तु है; अउर काटिबेबारे सरगदूत।

⁴⁰तउन जइसे जंगली दाने बटोरि अउर जलाये जात है; वैसेइ जगत केर अन्त में होयी। ⁴¹मनइ केर लरिका अपने सरग दूतन क भेजी, अउर वहिके नगर में ते सब ठोकर के कारन क अउर बुरे करम करइ वालेन क यकट्टा करिहैं। ⁴²अउर उइका आग केर कुंड मां डारिहैं, उहां रोउब अउर दांतु पीसब होई। ⁴³ऊ समय धरमी आपने बापू के नगर मां सूरज केर नाई चमकिहे; जेहिका कान होंय ऊ सुनि ले।

छिपे भवा खजाने अउर मोती केर उदाहरन

⁴⁴सरग का नगर खेत में छिपे भवा धन के समान है, जेहिका कोऊ मनइ ने पायके छिपा दिहिस, अउर मारे आनन्द के जाइके अउर अपुनौ सब कछु बेचिके बा खेत क मोलु लै लिहिस।

⁴⁵फिर सरग का राज एक व्यपारीक केर नाई है जउन अच्छे मोतीन केर खोज में रहै। ⁴⁶जबै ऊ का एक कीमती मोती मिल्यो तो ऊ खरीदे कै खातिर अपनि सबै कछु बेच दिहिस, अउर उइका मोलु लै लिहिस।

जाल केर मिसाल

⁴⁷फिर सरग का नगर उइ बड़े जाल के समान है, जउन समंदरु मां डारा गवा, अउर हर तिना केर मच्छरिन क बटोरि लावा। ⁴⁸अउर जब भरि गवा, तौ उइका किनारे पै खींचि लावा, अउर बैठिके नीक नीक मच्छरिन क टोकरीन में यकट्टा किहिन अउर निकम्मी क फेंकि दिहिन। ⁴⁹जगत के अन्त म ऐसेइ होई। सरग के दूत आइके दुस्मन ते धरमियन ते अलग करिहैं, अउर उइका आग के कुंड म डारि दे हैं। ⁵⁰हुंआ रोउब अउर दांतु पीसब होयी।

⁵¹का तुम ई सबै बातन क जानेउ समझेउ?

⁵²उइ उहिते कहिन — हां; उइ उन्ते कहिन, यही कारन हर एक साखी जउन सरग के नगर का चेला

बनौ है, ऊ गरहस्थ केर तिना है जउन अपने भंडार मा ते नई अउर पुरानी सामानन केर निकारत है।

नबी अपन नगर मा अनादर पावत है

⁵³जब यीसु ई सबै उदाहरन कहि चुकै, तो उहां ते चला गवा। ⁵⁴अउर अपन नगर में आयकें उनकी सभा में ऐसन उपदेस दैवे लगा; कि वे चकित हो कै कहै लागै कि जेहिका ई ग्यान अउर सामरथ केर काम कहां ते मिली? ⁵⁵का ई बढ़ई कै बेटा नाही? अउर का जेहिकी महतारी केर नाम मरियम नाही अउर जेहिके भईयन के नाम याकूब अउर यूसुफ, समौन अउर यहूदा नाही? ⁵⁶का जेहिकी सबै बहिने हमारे बीच में नाही रहै? फिर इनका ई सबु कहां ते मिली? ⁵⁷तउ उनहिन वहिके कारन ठोकर खाईन, मगर यीसु उन्ते कहिन, भबिसवकता अपन नगर अउर अपन घरौ क छोड़ि अउर कहू निरादर नाही होत।

⁵⁸अउर उइ हुआं उनके बिसवासु के कारन समरथ कर अनेकई काम नाही किहिन।

यहुन्ना बपतिसमा दाता

14 उइ समय चौथाई देसन केर राजा हेरोदेस के बारे में चरचा सुनिसि। ²अउर अपन सेवकन ते कहिसि, ई यहुन्ना बपतिसमा दैवेबालौ हवै; ऊ मुरदन मां ते जी उठा हई; यही कारन उहिके सामरथ के काम देखायी परत है।

³काहे ते हेरोदेस न अपन भाई फिलिप्पुस केर मेहरिया हेरोदियास के कारन, यहुन्ना के पकरि कै बाँधिसि अउर जेलखाने मा डारि दिहिस रहै। ⁴काहे ते यहुन्ना उनते कहिन रहै, कि जेहिका रखव नाहिन हइ। ⁵अउर ऊ उहिका मारि डारा चाहत रहै। मगर लोगन ते डेरत रहै। काहे ते वहिका नबी लोगन जानति रहै।

⁶मगर जबै हेरोदेस कै जनम दिनु आवा तबै हिरोदियास की बिटिया उतसव मा नाचु देखाइ के हेरोदेस क खुस करि हिदिस। ⁷यहि कारन ऊ कसम खाई कै बचन दिहिस कि जउन तुम मागिहौ तउन हम तुमका देबै। ⁸ऊ अपुनी महतारी कै उकसावै ते कहिसि यहुन्ना बपतिसमा देन वालेक सिर थार म हमका इहै मगवाय देव। ⁹राजा दुःखी भवा, मगर अपनिह कसम कै खातिर अउर साथै बैठे वाले लोगन के कान आग्या दिहिस कि “दै दीन जाय।”

¹⁰अउर कारागार म लोगन क भेजि कै यहुन्ना केर सिर कटवाय दिहिस। ¹¹वहिका सिर थारिया/विरिया मा लावा गवा, अउर ऊ वहिका अपन महतारी केर

पास लै गयी। ¹²अउर वहिके चेलन आइके अउर वहिकी लोथ क लै जाइ कै गाड़ि दिहिन। अउर जाइके यीसु क खबर दिहिस।

पांच हजार को

¹³जब यीसु सुनिन तौ नावै प चढ़ि कै कहू सुनसान जगह मा एकान्त म चला गवा अउर लोग ई सुनिकै नगर ते पैदले उहिकै पाछे हुई लिहिन। ¹⁴उइ निकरि कै बड़ी भीड़ देखिन; अउर वहिपै तरस खाइस; अउर वहिके बीमारन क चंगा करि दिहिस।

¹⁵जबै साझि होई गै तबै उहिके चेलौ वहिके पास आइके कहिन ई तौ सुनसान जगह है अउर देर होइ रही है। लोगन क हिया से विदा कीन जाय। जेहिते उइ बस्ती म जाइके अपन खातिर भोजन मोल लै लेयें।

¹⁶उ यीसु ते कहिन, उनहिन क जाब जरूरी नाहि है तुम इनहन क खायेक देव।

¹⁷यीसु उनते कहिन, हियां हमरे पास म पांच रोटी अउर दुई मछरी क छाड़ि कै कछु नाही है।

¹⁸ऊ कहिसि उन्हेका इहां हमरेइ पास लैआवौ। ¹⁹तबै उह लोगन क घास पे बैठेइ क कहिसि अउर उइ पांच रोटिन अर दुइ मछरी क लिहिन अउर सरग कै ओर देखि कै धन्यवाद कहिसि, अउर उइ रोटिन क तूरि-तूरि कै चेलन लोगन क दिहिन। ²⁰अउर सबै खायके तृप्त भये, अउर उनहन बचे हुए टुकरन ते भरी बारह टोकरीन क उठाइन। ²¹अउर खाबै वाली औरतन अउर लरिकन क छाड़ि कै पांच हजार मनइन कै अटकल रहै।

यीसु पानी पर चलत है

²²अउर उइ फौरन अपन चेलन क वरबस नावे पे चढ़ाइन जेहिते उहि उनहनते पास चले जाय। यहि बीच उइ लोगन क विदा करि देय। ²³बहु लोगन क विदा करिकै पराथना करिके अलग पहाड़ पे चढ़ि गयौ अउर साझै क अकेलु रहै। ²⁴उइ समय नाव झीलै क बीच म लहरन ते डगमगाती रही, काहे ते हवा सामने केर रहै।

²⁵अउर ऊ रात के चौथे पहर झीलु के ऊपर पै चलत भये उनकेर पास आवा। ²⁶चेलन ऊका झील प चलत भये देखिके घबराई गये; अउर कहै लागि, ऊ भूत है; अउर डरिके चिल्लाये उठै।

²⁷यीसु तुरन्तै उनते बात किहिन अउर कहिन, धीरज धरो; हम हन; डराव ना।

²⁸पतरस उहिका जवाबु दिहिस कि हे परभु, जदि

तुमही हौ,

²⁹उइ कहिसि आओ; तब पतरस नावु पै ते उतरि कै यीसु के नेरे जान खातिर पानी पै चलइ लागि।
³⁰मुला हवा क देखि कै डेराय गवा, अउर जब डूबै लाग तौ चिल्लाय कै कहिसि हे परभु हमका बचावउ।

³¹यीसु तुरते हाथ क बढ़ाइकै उहिका थामि लिहिसि। अउर उहिते कहिन हे अलपविस्वासी तुम काहे क सका किहेव।

³²जब उइ नाव पै चढ़िगै, तौ हवा रुकिगै।³³येहिसे जौन नरव पर रह उइ उनका परनाम करिके कहन साधि तुम परमेसुर कै लरिका हव।

³⁴उइ पार उतरि कै गनेसरत देस मा पहुंचे।
³⁵हुआं के लोग उनका पयियानि के नेरे के सारी जगहां में कहवाय दिहिन कि सब बीमार क उनके पास लै आवैं।³⁶अउर उहिते बिनती करै लागै, कि ऊ उन्हे अपने कपड़ा के आँचरि छीका छुवै दें अउर जे—जे उनका छुइसि नीक होई गए।

सुद्ध अउर असुद्ध केर सवाल

15 तब येरूसलम ते केतने फरीसी अउर सास्त्री यीसु के नेरे आइके कहै लागे।²तुम्हार चेला पुरनियन केर रीतन का काहे नाहीं मानत है कि रोटी खात बखत हाथ नहीं धोउते?

³उइ उनका जवाबु दिहिस कि तुमहूँ अपनी रीत के नाते परमेसुर कै कहा नाहीं मनतेव।⁴काहे ते परमेसुर कहिन तुम अपने बापू अउर आपन महतारी कै आदर किहैव, अउर जो अपने महतारी—बाप का बुरा कहै ऊ मारि डारा जाइ।⁵मुला तुम कहत हौ, कि अगर कोऊ अपनी महतारी या बापू ते कहै, कि, जउन कछु तुमका हमते फायदा होइ सकत रहा ऊ परमेसुर का भेटि मां चढ़ावा जाय चुका है।⁶तौ ऊ अपने बापू कै आदर न करै, तउने तुम अपनी रीतन की वदै परमेसुर के बचन नाहीं मानेव।⁷अउर ओ कपट राखै वालै, यसायाह तुम्हरे बारे म ई ठीकै कहिन रहा।

⁸कि ई लोग मुह से तौ हमार आदर करत हैं। मुला उनकै मन हमरे से दूर रहत हैं।

⁹अउर उइ हमार उपासना बेकारे करत हैं काहे ते मनइन के तरीकन का धरम कै उपदेसु करि के सिखावत हैं।

¹⁰अउर उइ उनका अपने नेरे बोलाइ कै उनसे कहिन सुनौ अउर समझौ।¹¹जउन मुंह मा जात है ऊ मनइ का असुद्ध नाहीं करत मुला जउन मुंह से निकरत है वहै मनइ का असुद्ध करत है।

¹²तब चलन आइके उनसे कहिन का तुम जानत

हौ कि फरीसी ई बचन सुनि कै ठोकर खाइन।

¹³ऊ जवाबु दिहिस, जउन बिरवा हमार बाप नाहीं लगाइस ऊ उखारा जाई।¹⁴उनका जाइ देव ऊ अंधेरा रास्ता देखावै वाले हैं और अन्धा अउर अन्धा का रास्ता बतावै तौ दुनउ गइहा मा गिरि परिहैं।

¹⁵ई सुनिकै, पतरस उनते कहिन, ई उदाहरन हमका समझाय देव।

¹⁶ऊ कहिन, का तुमऊ अबही तक ना समझ पायेव।¹⁷का नाहीं जानत हव कि जउन कछु मुंह मा जात और पेट मा परत हैं ऊ सन्डास मा निकरि जात है।¹⁸मुला जउन कछु मुंह ते निकरै है, ऊ मन ते निकरै है, अउर बोई मनइ क असुद्ध करै है।¹⁹काहे ते बुरी चिन्ता, हतिया, दूसरे कै मेहरारु राखेव, बेभिचार, चोरी, झूठी गवाही अउर निन्दा मनइ के मन ही ते निकरत हैं।²⁰यहै है जउन मनइ का असुद्ध करत है, मुला बिना हाथ धोये खाना खाव मनइ क असुद्ध नाहीं करत है।

कनानी औरत केर बिसवासु

²¹यीसु इहां ते निकरि के सूर अउर सैदा के देसन के ओर चला गवा।²²अउर देखौ, उइ देसन ते एक कनानी औरत निकरी, अउर चिल्लाई कै कहै लागि, हे परभु दाऊद केर बेटवा हमरे ऊपर दया करौ, हमरी बिटिया का बुरा आतमा बहुतै सतावत रही है।

²³मुला ऊ उइका कछु जवाबु नाहीं दिहिस, अउर वहिके चलन ने आइकै बिनती किहिन, कि यहिका विदा करौ, काहे ते ऊ हमरे पीछे आवत है।

²⁴उइ जवाबु दिहिन कि इसराएल घराने कै हैरान भेड़न का छोड़ि के हम केहू के पास नाहीं भेजे गयेन।

²⁵मुला मनइ आयी अउर उनका परनामु कइकै कहै लागै कि हे परभु हमार मदद करौ।

²⁶ऊ जवाबु दिहिन, कि लरिकन केर रोटी कूकुर कै आगे डारव ठीक नाहीं।

²⁷ऊ कहिसि चांसि है परभु मुला कूकुरौ बहु खात है जउन उनकेर मालिकन क जूठन बचत है।

²⁸यहि पौ यीसु उइका जवाबु देइ के कहिन कि ओ औरत तोहार बिसवासु बड़ा है। जइसन तुम चाहत है, तोहरे खातिर वैसेइ होइ अउर ऊ कै बिटिया वही समयया नीक होइ गई।

चारि हजार लोगन का भोजु

²⁹यीसु हुआं ते चलिके, गलील केर झील के नेरे आये, अउर पहाड़ पै चढ़िके उहां पै बैठि गये।

³⁰अउर भीड़ पै भीड़ लंगड़े, लूले, अन्धे, गूंगे, दुडे,

अउर बहुत क लैकें उनके नेरे आये, अउर उनका पैरन पै डारि दिहिन अउर ऊ वनका नीक कई दिहिस।³¹तउन जब लोग देखिन कि गूगे बोलत हैं, अउर टुडे नीक होवत हैं लगडें चलन लागे हैं, अउर अन्धे देखत हैं, तौ लोग अचम्भौ करिकें इसराएल के परमेसुर केर बड़ाई किहिन।

³²यीसु अपने चेलन क बुलाई कै कहिन, हमका ई भीड़ पै तरस आवत है, काहेते ई तीन दिन ते हमरे साथे हैं, अउर वनके पास कछु खाये के खातिर नाही है। अउर हम ऊका भूखा भेजा चाहित, हैं। कहू ऐसन न होय कि रास्ता मा थकि के रहि जाय।

³³चेले ऊते कहिन, हमका ई जंगल मां कहां एतनी रोटी मिलिहैं कि हम एतनी भीड़ कै भूख मिटाय पाउव।

³⁴यीसु उनते पूछिन तुमरे पास केतनी रोटी हौ? उइ कहिन सात अउर थोरी नान्ह मछरी हैं।

³⁵तब उइ लोगन ते जमीन पै बैठेइ का कहिन।
³⁶अउर उइ सात रोटी अउर मछरी का लै धन्यवाद करिके तोड़िस अउर अपने चेलन का देत गये।
³⁷तउन सबे पेट भरि गवा अउर बचे टुकरन ते सात टोकरी उठाइन।³⁸अउर खाय वाले औरत अउर बच्चन का छोड़ि कै चार हजार मनइ रहे।³⁹तब उइ भीड़ का भेजि के नाव पर चढ़ि गवा अउर मवादन देस के सिवानन मा आये।

निसान द्याखेय के खातिर मांग किहिन

16अउर फरीसिन अउर सदूकिन नेरे आइके उनका परखे खातिर उनते कहिन कि हमका अकास कै कउनो निसान दिखावव।

²उइ उनका जवाबु दिनि कि संझा क तुम कहत हव कि खुला रही काते ते कि आकास लाल हौ।
³अउर भोर का कहत हौ कि आज आंधी आयी काहे ते आकास लाल अउर धूमिल हैयो। तुम आकास के लछनै देखिके भेद बताये सकत हौ, मुला समय कै निसान नहीं बताये सकत हौ।⁴ई जुग के बुरे अउर बेभिचारी करै वाले लोग चीन्ह दूढ़त है मुला यूनस कै चीन्ह का छोड़ि के कउनउ अउर चीन्ह उनका नाही दीन जाई अउर ऊ उका छाड़ि के चला गवा।

फरीसिन अउर सदूकियन केर खमीर केर बारे मा

⁵अउर चेले जात बखत रोटी लेब भूलि गे।
⁶यीसु उनते कहिन, देखौ; फरीसिन अउर सदूकियन के खमीर तै चौकस रहेब।

⁷उइ आपस मा विचार करै लागे कि हम तौ रोटी

नाहिन लायेन।

⁸ई जानिके यीसु उनते कहिन, अरे थोर विसवासी तुम आपस मा काहे सोचत हौ कि हमरे पास रोटी नाही है।⁹का तुम अबलौ तक नाही जानेव? अउर ऊ पांच हजार के पांच रोटी याद नाही करतेव, अउर न ई कि केतने टोकरी उठाये गये रहे।¹⁰अउर ऊ चार हजार की सात रोटी अउर न ई कि कितने टोकरे उठाये गये रहे।¹¹तुम काहे नाही समझत हो कि हम तुमते रोटिन के बारे मे नाही कहव फरीसियन अउर सदूकिन केर खमीर ते होसियार रहेय।¹²जब ऊकी समझ मां आई गवा कि उइ रोटी के खमीर ते नाही रहे का कहिन रहे।

पतरस का यीसु क मसीह स्वीकारना

¹³यीसु कै सरिया फिलिप्यों के देस मा आइके अपने चेलन ते पूछे लागे कि लोग मनइ के लरिका क कहत हैं?

¹⁴उइ कहिन, केतने तौ यहुन्ना वपतिसमा दै वाला कहत है। अउर केतने एलिय्याह, अउर केतने यरमयाह या नबी मा ते कउनव एक कहत है।

¹⁵उइ उनते कहिन; मुला तुम हमका का कहत हौ?

¹⁶समौन पतरस जवाबु दिहिन कि तुम परमेसुर कै लरिका मसीह होओ।

¹⁷यीसु ऊ का जवाबु दिहिन कि समौन योना केर लरिका, तुम धन्य हौ; काहे ते मांस अउर लोहू नाही, मुला हमरे बाप जउन सरग मा है, ई बतिया तुम पर परगट किहिन है।¹⁸अउर हमहू तुमते कहित है कि तुम पतरस हौ, अउर हम ई पाथर पर आपन कलीसिया बनाइव; अउर अधोलोक कै फाटक ऊपर परबल न होई।¹⁹हम तुमका सरग कै नगर केर कुंजी देब, अउर जउन कछु तुम धरती पर बंधिहौ अउर जउन तुम जमीन पर खोलिहौ, ऊ सरग मा खुली।²⁰तब उई चेलन का चेताइन कि केहू ते न कहेव कि हम मसीह हन।

अपन मौत केर भविसवानी

²¹उइ बखत ते यीसु अपने चेलन का बताबै लागि कि जरूरी है कि हम यरुसलेम जाई अउर पुरनियां अउर महायाजकन अउर साख्रीन केर हाथ ते बहुत दुःख उठाई अउर मार डारा जाई। अउर तिसरे दिन जी उठी।

²²ई पर पतरस उइका अलग लै जायके झिड़कै लागि कि हे परभु, परमेसुर न करै, तुमरे ऊपर ऐसन

कबहूँ न होई।

²³ऊ मुड़िके पतरस ते कहिन, हे सैतान, हमरे सामने ते दूरि होई जाव तुम हमरी खातिर टोकर कै कारन हो, काहे ते तु परमेसुर केर बातन पर नाही, मुला मनइ केर बातन पै जियादा गउर करत हो।

²⁴तब यीसु अपने चेलन ते कहिन; कि, जदि कोऊ हमरे साथे आइस चाहे तौ अपने आपका इनकार करै अउर आपन सूली उठावै, अउर हमरे पाछे हुई लेय। ²⁵काहे ते जउन कोऊ आपन परान न बचावा चाहे, ऊ उइका खोई अउर जउन हमरे खातिर आपन परान खोई ऊ उइका पाई। ²⁶यदि मनइ सारी जगत का पाइ जाई अउर अपन परान कै हानि उठावै, तो उइका का फायदा होई? या मनइ अपने परान कै बदले मां का देयी? ²⁷मनइ कै लरिका अपने सरग दूतन के साथे अपन बाप केर महिमा मां आयी अउर ऊ बखत ऊ हर एक का वहिके काम के हिसाब ते फल देयी। ²⁸हम तुमते साधि कहित है कि जउन हियां खडे हैं, उनमा ते केतने ऐसन हैं कि जबलै मनइ के लरिका उनके राज मा आवत भये न देखि लैहैं, तब तक का सवाद कबौ न चखिहैं।

यीसु केर रूप कय परिवरतन

17छह दिन के बाद यीसु ने पतरस अउर याकूब अउर वहिके भाई यहुना का साथ लै लिहिन। अउर उन सबका एकान्त मा कौनेउ उंचे पहाड़ पर लै गवा। ²अउर उइके सामने वहिका रूप बदलि गवा, अउर वहिका मुंह सूरज केर नाई चमकै लागि अउर उहिका कपड़ा उजर हुइ गवा। ³अउर देखउ मूसा अउर एलिय्याह वहिके साथे बातेंइ करत उन सबका दिखाई परे।

⁴यहि पर पतरस यीसु ते कहिन, हे परभु, हम लोगन हियां रहब नीक हवै। जू हुवै तो हियां तीन झोंपड़ी बनाई। याक तोहरे तई, याक मूसा तई, अउर याक एलिय्याह तई।

⁵ऊ बोलते रहै हो, कि देखौ याक उज्जर बादर उनका छाया लिहिस अउर देख्यौ, उई बादर में ते या आकासवानी भई कि ई हमार दुलारा लरिका हय ई उहते हम खुस हन, सुनव।

⁶चेले ई सुनतै मुंह के बलै गिरिगै, अउर बहुतै डरिगे। ⁷यीसु उन सबके पास आय के उनका छुइन, अउर कहै लागि उठव; डेराव नाही। ⁸तब उइ सब अपन आँखी खोलिकै यीसु के अलावा अउर कोई का नाही देखिन।

⁹जब उई पहाड़ ते उतर रहै तब यीसु उनहिन ते यह कहिन कि जब तलक मनइ का लरिका मेरे भये में ते जी न उठै, तब तलक, जउन कछु तुम देखेव हो, कोई ते न कहेब।

¹⁰अउर वहिके चेला वहिते पूछिन कि फिन सास्त्री काहे कहत है कि एलियाह का पहिले आउब जरूरी है।

¹¹ऊ कहिसि कि एलियाह तो अइबै करिहैं अउर ऊ सबे कछु ठकी करी। ¹²मगर हम तुमते कहित हैं कि एलियाह आय गवा है अउर कोई वहिका नाही पहिचानिस मगर जउन चाहेन वहै वहि के साथे किहेन जेहि रीत ते मनइ का पेटवा उनके हाथु ते दुख उठइ हैं। ¹³तब चेला समझिन कि ऊ हम ते यहुना बपतिस्मा दिये वाले के तई कहत है।

मिरगी वाले लरिका केर चंगाई

¹⁴जब उइ भीड़ के पास पहुंचे, तब याक मनई वहिके पास आवा अउर टुहनी के बल बइठ कै कहय लागि। ¹⁵हे परभु, हमरे लरिका पै दया करौ, काहे ते वहिका मिरगी आवत है अउर ऊ बहुतय दुख उठावत हय, अउर बेरि बेरि आगि अउर बेरि बेरि पानी मा गिरि जावत है। ¹⁶अउर हम वहिका तुम्हरे चेलन के पास लायेन रहै, मुला ऊ वहिका ठीक नाही कर पाइन।

¹⁷यीसु कहिन ओ विसुवासु न करै वाले अउर जिद्दी लोगों हम कब तक तुम्हरे साथे रहेब, कब तक तुम्हारि सहिकै, वहिका हियां हमरे पास लाउ। ¹⁸तब यीसु वहिका फटकारिन, अउर सैतान वहिमा ते निकरा अउर लरिकवा वाही समय मा ठीक हुइ गवा।

¹⁹तब उइ चेलन ने एकान्त में यीसु के पास आयकें कहिन, हम जिन्हका नांय निकारि पायेन।

²⁰ऊ उनते कहिसि कि तुमका बिसुवासु नाई रहय, काहे ते हम तुमते सांची कहित हैं कि अगर तुम्हार बिसुवासु सरसों के दाना कै बराबर हुवै तब ई पहाड़ ते कह सकिहौ कि हियां ते सरकि कय हुआं चले जाव तौ ऊ चला जाई, अउर कउनिव छु बात तुमरे ताई अनहोनी न होई। ²¹जब उइ गलील मां रहय, तब यीसु उनते कहिन कि मनइ का लरिका मनइ के हाथन मा पकरावा जाई।

²²अउर उइ वहिका मार डरि हैं अउर ऊ तीन दिन कै बाद जी उठी। ²³यहि पर उइ बहुतै उदास होइगै।

मंदिर केर कर

²⁴जब उइ कफरनहूम मा पहुंचिगे, तउ मंदिर तेई

चन्दा लिय वाले पतरस के पास आयकै पूछिन कि का तुम्हार गुरु मंदिर केर नाही दियत है ऊ कहिस हां दियत तो है।

²⁵जब ऊ घर मां आवा, तब यीसु वहिसे पूछै के पहिले वहिते कहिन कि हे समौन तू का समझत है कि धरती के राजा महसूल केहिसे लियत हय अपन लरिकन ते या दुसरेन ते। पतरस उनते कहिन कि दुसरेन ते।

²⁶यीसु वहिते कहन तब तौ बेटवन बचि गे। ²⁷तौ भी यहि के तई कि हम उनका टोकर न खवायें तू झील के किनारे वहिका लियाउ तो तुमका मुंह खोलइ एक सिक्का मिली वहि लैके हमरे अउर आपनि बदले वहिका दै दिहेव।

सरग केर राज्य मा कउन बड़ा हय

18ऊ समय मां चले यीसु के पास आयके पूछे लागि कि सरग कै राज मां बड़ा कउन है?

²यहि पर ऊ एक बचवा का पास बोलाय कै ऊ के बीच मां खड़ा किहिस। ³अउर कहिस, हम तुमते सांचु कहित है कि तुम न फिरौ अउर लरिकन के अइस न बनौ तब सरग कै राज मा न पड़हौ। ⁴जउन कोऊ अपन का ई लरिका की नाई छोट लेई सरग कै राज मा बड़ा होई।

⁵अउर जउन कोऊ हमरे नाम ते एक अइस लरिका का गरहन करत है, वह गरहन हमका करत है। ⁶मुला जउन कोऊ इन छोटन पर ते हम पर बिसवासु करत है, याक का टोकर खवावै, वहिके खातिर भलौ होतौ, कि बड़ी चक्की केर पाट वहिके गरई मां लटकावा जात, अउर ऊ गहिरे समुंदर मा बोरि दीन जाय।

⁷टोकरन के कारन संसार पै हाय! टोकरन का लागव जरूर है मुला हाय उई मनइ पै जेहिके कारन टोकर लागत है। ⁸यदि तुम्हार हाथ या पाँव तुमका टोकर खवावे, तब काटि के फेंक दियौ; टुंडा या लंगड़ा होयके जिन्दगी मा घुसी जाव तुम्हरे तई वहिते ठीक ठीक हवे कि दुइ पाँव या दुई हाथ रहत भये अनन्त आगी मां डारे जाय। ⁹अउर यदि तुम्हार आंखि टोकर खवावै तब वहिका निकरि कै फेंक देवि।

भटकी भई भेड़ केर उदाहरन

¹⁰काना होयके जिन्दगी मां घुसौ तुम्हरे तई अच्छा है कि दुइ आंखीरहत भये तुम नरक की आगी मां डारे जाव। ¹¹देखौ, तुम इन छोटन मां ते कोई का तुच्छ न समझौ याही तई हम तौहसे कहित है कि सरग मा

वहिके दूत हमरे सरग मां रहे वाले बाप का मुंह हमेसा देखत हय।

¹²तुम का समझात हव कि जदि कउनउ मनइ केर सौ भेड़ें हैं अउर वहिमा ते याक हेराय जाय, तब का निन्नानबे कहियां छोड़ि कय, अउर पहारु पइ जाय कय हेरान भेड़ का न ढूंढी? ¹³अउर यदि अइसन हुवै कि वहिका पाय, जाय तब हम तुमते सांच कहित है, कि ऊ उइ निन्नानबे भेड़िन खातिर जउन खोई नाही रहय अतना आनन्द ना खुस होई जितना कि हेरान भेड़ का पाय कय खुस हुवत है। ¹⁴अइसने तुम्हार बाप जउन सरग मां हय उनका मन न होई कि इन छोटन म इसे कउनो हेराय।

भाइयन केर झगरे केर फैसिला

¹⁵यदि तुम्हार भाई अपराध करै, तब जाव अउर अकेल मा बात—चीत करिके वहिका समझाउ, यदि ऊ तुम्हार बाति मान जाय तब तुम अपन भाई का पाप लिहेव। ¹⁶यदि ऊ तुम्हार न सुनै, तौ अउर याक दुई जनै का अपन साथै लै जाव कि हर याक बात दुई या तीन गवाहन के मुंहि ते ठहराई जाय। ¹⁷अउर यदि ऊ उनहन केर न मानै, तब कलिसिया ते कहि दियौ, मुला कलिसियौ केर ना मानै, तब तू वहिका दूसरी जाति अउर महसूल लेय वालेन के अइसन जानेव।

¹⁸हम तुम ते साँची कहित है, जउन कुछु तुम धरती पर बधिहौ वाहै सरग मां बंधी अउर जौन कुछु तू धरती पर बोलि होवहीं सग मा खुली।

¹⁹फिर हम तुमते कहत है कि जदि जउन मा ते दुई जनै धरती पर कवनिउ बाति की तई जउन उइ मांगै याकै मन के हुवै तब ऊ हमार बापू की तरफ सेनी जो सरग मा है वन की तई होइ जाई। ²⁰यही तई उहां दुइ या तीन हमरे नाम पर यकड़ा हुवत है हम उनके बीच मा होइत है।

निरदयी दासु केर माफ करै केर मिसाल

²¹तब पतरस उनके पास आयकै कहिन हे परभु यदि हमार भाई अपराध करत रहय तब हम केतनी बार वहिका छिमा करी का सात बार तक।

²²यीसु ने वहाँ से कहा हम तौहसे यू नाही कहित है कि सात बार के वरन सात बार के सत्तर गुना तक।

²³यहिते सरग का राज उइ राजा के समान है, हवै जउन अपने दासन ते लेखा लेव चाहै। ²⁴जब ऊ लेखा लेय लाग, तब एक जना वहिके समनवां पास लावा गै जउन दस हजार तोड़े धरतौ रहौ। ²⁵जबकि

चुकावे कि तई वहिके पास कुछौ नाहीं रहै, तब वहिके मालिक कहिसि कि ई अउर यहिकी मेहरूआ अउर लरिका बच्चा अउर कुछ यहिका है। सब बेच देव अउर ऊ करजा चुकाय दीन जाय।

²⁶यहि पर ऊ दास गिरि कै परनाम कहिसि अउर कहिसि हे मालिक धीरज धरौ हम सब कुछ भर देव।

²⁷तब उइ दास के मालिक ने तरस खाय कै वहिका छोड़ि दिहिस अउर वहिका उधार माफु कै दिहिस।

²⁸मुला जब ऊ बाहर निकरा, तब वहिके संगी दासन म से एक वहिका मिला जउन वहिके सौ दीनार चहत रहै। ऊ वहिका पकरि के वहिका गटई दबाइस अउर कहिसि जउन तुम धरत हो दे देव।

²⁹यहि पर वहिका संगी दास गिरि कै विनती करै लागि।

³⁰ऊ नाहीं मानिस अउर लै जायकै जेल मा बन्द कै दिहिस कि जब लौ करज न देवौ तब लौ हिय रहिहो। ³¹वहिके संगी दास यू सब देखिकै बहुतै उदास हुइगे। अउर जायकै अपने मालिक का पूरा किस्सा बताइन।

³²तब वहिके मालिक ने ऊ का बुलाय कै कहि हे दुस्त दास तू जउन हमते विनती किहेव रहा तो हम तोहार पूरा करजा माफ कर दीन। ³³सो जइसन हम तोहरे पर दया किहेन वइसे तोहका अपने साथी दास पर दया न करवई का न चाही। ³⁴फिर वहिके मालिक ने गुस्सा कै कै वहिका सजा देय वालेन के हाथन मा दे दिहिस क जब तक यू करजा नाहीं चुकाये देते तब तक वनहिन के हाथन मा रहै।

³⁵यही मेर यदि तुममा ते हर एक भाइन का मन ते माफु न करी तो हमार बाद जउन सरग मा है तुम हूं ते वैसनै करी।

तलाक

19 जब यीसु यू सब कहि चुके तब गलील ते चला गवा, अउर यहूदिया के देस मा यरदन के पार आवा। ²अउर बड़ी भीड़ वहिके पीछे होइगै अउर उसने उनहें वहिइ चंगा किहिस।

³तब फरीसी उहिकी परीच्छा लिये कि तई वहिके पास आयकै कहै लागि का हर एक कारन ते आपनि ये मेहरारू का छोड़व ठीक है

⁴ऊ कहिसि का तुम नाहीं पढ़ेव कि जउन उनका बताइस हे वहै पहिले ते मनइ अउर ये हरिया बनाई कै कहिसि। ⁵यहि कि तई मनइ अपने महतारी बाप ते अलग होइके आनि मेहरारू केर साथे रही अउर उइ दोनों एक तन हुइ हैं। ⁶सो उइ अब दुइ नहीं एक तन

है। यही लिये जेहिका परमेसुर जोडेसि हय वहिका मनइ अलगे न करै।

⁷उइ वनसे कहिन कि मूसा ने काहे यू ठहराइन कि तियागपत्र इदकै वहिका छोड़ि देव।

⁸उइ उनते कहिन मूसा ने तुम्हरे मन कै कठोरता के कारन तोहका आपनि—आपनि मेहरिया छोड़ि दियै का आग्या दिहिन मगर पहिले ते अइसन नाहीं रहे।

⁹अउर हम तुमते कहित हैं कि जउन कोऊ बेभिचार को छोड़ि अउर कउने कारन ते, आपनि मेहरिया का छोड़ि करकै दूसरी ते बियाह करे वहै बेभिचार करत हवै।

¹⁰चेलन ने उनते कहिन, यदि मनइ का मेहरिया के साथ अइसन सम्बन्ध हवै, तब बियाह करब ठीक नाही है।

¹¹उइ उनते कहिन कि सब ई बात नहीं मान सकत केवल ऊ जिनका इउ दान दीन गवा है। ¹²काहे ते कछु नपुसक अइसन हवै जउन महतारी ते अइसन जनम लिहिन अउर कुछ नामर्द अइसन हवैं। जिनका मनइ नामर्द बनाय दिहिन अउर कुछ नामर्द एइसन हवै जउन सरग की राज तई अपनेन आपै का नामर्द बनाय लिहिन जउन यहिका मानत है वहै मानै।

यीसु अउर छोटे बालकन

¹³तब लोग लरिकन का वहिके नेरे लाये कि ऊ उन पै आपन हाथ रखै अउर पराथना करै; मुला चेलन उनका फटकारिन।

¹⁴यीसु कहिन, लरिकन का नेरे आवय दियौ अउर मना न करेब काहे ते सरग का राज अइसनै का आही। ¹⁵अउर उनका ऊ उनपै हाथ रखिकै हुवां ते चला गवा।

धनी मनइ

¹⁶अउर देखौ एक मनइ नेरे आयकै वहिते कहिसि हे गुरु हम कउन सा अच्छा काम करीं कि अनन्त जीवन पाई।

¹⁷ऊ वहिते कहिसि, तुम हमते भलाई के बारे मां काहे पूछत हव, अच्छा तो एकई हवै, मुला यदि तुम जीवन मां घुसा चाहत हव तव आइन केर माना करौ।

¹⁸ऊ वहिते कहिसि, कउन सी आग्या, यीसु कहिन ई कि हतिया न कइयो, बेभिचार न करेव, चोरी न करेव, झूठी गवाही न दियेव। ¹⁹अपने बाप अउर अपनी महतारी का आदर करव, अउर आपनि पड़ासिन ते अपने समान परेम रखेव।

²⁰ऊ जवान वहिते कहिसि ई सब तौ मानेन हैं।

अब हमका कउन कमी हवै।

²¹यीसु वहिते कहिन यदि तू सिद्ध होवे का चाहत हव तब जाव, आपन समान बेचि कई कंगालन का दै देव, अउर तुमका सरग मा धन मिलि हैं। अउर आइके हमरे पाछे होइलिऐउ।

²²मुला ऊ जवान ई बात सुनिकै उदास होइके चला गवा। काहे ते उई बहुतै धनी रहै।

²³तब यीसु चेलन ते कहिन हम तुमते सांचु कहित हैं कि धनवान केर सरग के राज मां घुसब कठिन होई। ²⁴फिर तुमते कहित हैं कि परमेसुर के राज में धनवान के घुसब ते ऊंट का सुई के छेद ते निकरि जाब आसान है।

²⁵यू सुनिकै चेलौ बहुतै चकित हुइ कै कहिन केकर उद्धार हुइ सकत है।

²⁶यीसु वहिके ओर देखि कै कहिन मनइन ते तौ ई होइ नाही सकत है, मुला परमेसुर ते सबै कछु होई सकत हैं।

²⁷यहि पर पतरस वहिते कहिन कि देखव, हम तब सब कुछ छाड़ि के तुम्हरे पाछे हुइ लिहिन है। तब हमका का मिली?

²⁸यीसु उनते कहिन, हम तुमते सांची कहित हैं कि नई पैदाइस ते जब मनइ का लरिका आपन महिमा केर सिंहासन पर बैठि तब तुमहू जउन हमरे पाछे होइ लिहे बारह सिंहासनों पै बैठि के इसराएल के बारह गोतरन का नियावु करिहैं। ²⁹अउर जो कोउे घर भाई या बहिन या बाप या महतारी या लरिकन या खेतन का हमरे नाम की खातिर छोड़ि दिहिन वहिका सौ गुना मिली। अउर वहि अनन्त जीवन का अधिकारी होई। ³⁰मुला बहुतेरे जउन पहिले हवै, पाछे होई हैं। अउर जउन पाछे हवै, पहिले हुइहैं।

अंगूर केर बारी केर मजूरन केर मिसाल

20 सरग का राज गृहस्थ के समान हवै। जउन सबेरे निकरा कि अपने अंगूर केर बारी मां मजूरन का लगाइवे। ²अउर ऊ मजूरन ते याक दीनार के रोज पैतेय करिके उनका अपनी दाख केर बारी मां पटै दिहिस।

³फिर पहर याक दिन चढ़ै, निकरि कै अउर दुसरन का बाजार मा खड़े देखिके। ⁴उनते कहिसि तुमहू दाख की बारी मा जाव, अउर जउन ठीक है तुमका देवै सो उनहूँ गये। ⁵फिर ऊ दूसरे अउर तिसरे पहर के करीब निकरि के वैसेइ किहिस। ⁶अउर एक घंटा दिन रहे फिर निकरि कै, अउरन का खड़ा पाइस अउर उनहूँ ते कहिसि तुम काहे हियां दिन भर बेकार खड़े

रहेउ? उइ उनसे कहिन यहि की तई कि कउनव मजूरी पै नाही लगाइस।

⁷ऊ उनते कहिसि, तुमता दाख केर बारी मा जाब।

⁸सांझ का दाख केर बारी के मालिक अपने भंडारी ते कहिसि मजूरन का बुलाय के पाछे ते लइके पहिले तक मजूरी दै देव।

⁹सो जब सब आये जउन घंटा भर दिन रहे लगाये गये रहै तउन उनहुन एक दीनार मिल। ¹⁰जउन पहिले ते आये रहै उइ यू समझिन कि हमका ज्यादा मिली मुला वनहुन का एकै दीनार मिल। ¹¹जब मिल तब उइ गरहस्थ पै कुड़कुड़ाइ कै कहै लागि। ¹²कि जउन पाछे आये अउर एकै घंटा काम किहिन अउर तुमने उनका हमरे बराबर दिहेव अउर जउन दिन भर भार उठाइन अउर घाम सहिन?

¹³ऊ उइमा ते एक जवाबु दिहिस कि हे मित्र हम तुमते कुछ अनियाउ तो नाही किहेन का तुम हमते एक दीनार नाही ठहरावा। ¹⁴जउन तुम्हार हय उठाय लियव अउर चले जाव हमारि मन की जितना तुमका उतनै हम पाछे वाले का देई। ¹⁵का ठीक नाही है कि हम आपन माल ते जउन चाहीं तउन करी? का तुम हमरे भलै हवै वदे खराब नजर ते देखत हौ?

¹⁶यही तरीके ते जउन पाछे है उइ पहिले होई हैं। अउर जउन पहिले हवै उइ पाछे हुइहैं।

यीसु केर मरन खातिर भबिसवानी

¹⁷यीसु येरुसलम जात समय बारह चेलन का एकान्त मा लै गवा, अउर रास्ता मां उनते कहै लागि। ¹⁸कि देखौ, हम येरुसलम का जाइत है अउर मनइ का लरिका महायाजकन अउर सास्त्रीन के हाथ पकरवावा जाई अउर उइ वहिका मारै के काबिल बतईहैं। ¹⁹अउर वहिका दुसर जातिन केर हाथन सौपिहैं कि उइ वहिका ठट्टन मा उड़ावै, अउर कोड़ा मारै, अउर सूली पे चढ़ावै, अउर फिर तीन दिन बाद जिन्दा कीन जाई।

माई केर पराथना

²⁰तब जबदी के लरिका की महतारी ने आपनि लरिकन का साथे लइकै, ऊ के नेरे आय कै परनाम किहिसि, अउर वहिते कछु मांगय लागि।

²¹ऊ वहिते कहिसि, तू का चाहत हवै ऊ वहिते कहिसि यू कहव कि हमार ई दुई लरिका तुम्हरे राज मां एक तुम्हरे दाहिने बैठय अउर एक तुम्हरे बाये बैठय।

²²यीसु कहिन तुम नाही जानत हौ कि का मांगत

हो, जउन कटोरा हमरे पीवै तई है का तुम पी सकत हव, वै कहिन पी सकत है।

²³उइ उनते कहिन, तुम हमार कटोरा तौ पियौ, मुला अपने दहिने, बाये कोई का बैठाव का हमार काम न आय, मुला इनके खातिर हमार बाप के ओर ते तैयार कीन गवा, उनहिन खातिर हवै।

²⁴यू सुनिके दसौ चेला उन दूनौ भाइन पै गुस्सा हुइगे। ²⁵यीसु उनका नेरे बुलायके कहिन तुम जानत हव कि दूसरे जातिन के हाकिम उन पर परभुता करत हवै अउर जउन बड़े हवै उन पर अधिकार जमावत है। ²⁶मुला तुम मा अइसन न होई, मुला जउन तुममां बड़ा बनै का चाही ऊ तुम्हार सेवक बनी। ²⁷अउर जउन तुममा परधान बना चाही ऊ तुम्हार दास बनी। ²⁸अइसन कि मनइ का लरिका ऊ यहिकी तइ नाई आवा है कि वहिकी सेवा टहल कीन जाई। मुला यहि ते आवा हवै कि आय सेवा टहल करौ; अउर बहुतन की छुड़ौती तई आपन जान दै देव।

दो अंधन का आंख खोलब

²⁹जब उई यरीहों ते निकरत रहै तब एक बड़ी भीड़ वहिके पाछे लागिगै। ³⁰अउर देखव, दुइ आंधर जउन सड़क किनारे बइठे रहे यू सुनिके कि यीसु जात हवै। पुकारिके कहै लागि कि हे परभु दाऊद के लरिका हम पै दया करौ।

³¹लोग उनका फटकारिन कि कि चुप रहौ, मुला उइ अउरो चिल्लाय के कहिन के परभु दाऊद के लरिका हम पे दया करौ।

³²तब यीसु ठाड़े उइके बुलाइन अउर कहिन।

³³तुम का चाहत हव, कि हम तुहरी खातिर करी। वै उहिते कहिन, हे परभु, हमरी आंखे हुई जाय।

³⁴यीसु तरस खाइके उनकी आंखिन का छुइन अउर उइ तुरन्त देखै लागै अउर उनहिन के पाछे हुइ लिहिन।

यीसु केर यरुसलेम मा परवेस

21 जब उई यरुसलेम के नेरे पहुंच गये, अउर जैतून पहाड़ पै बैतफगे के नेरे आवा तब यीसु ने दुइ चेलन केर इव कहिके पठइन। ²कि अपने सामने वाले गांव में जाव, अउर हुवां पहुंचति याक गदही बांधी है अउर उहिके साथे बच्चा तुमका मिली। अउर वहिका खोलिके हमरे पास ले आवो। ³यदि तुमते कोऊ कछु कहै, तो कहेव कि परभु को इनका परयोजन हवै, तब उइ तुरन्त पठइ देई।

⁴यू यहि के तई हुई कि जउन बचन भविसवकता दवारा कहा गवा रहै ऊ पूरा हुवै।

⁵कि सिय्योन केर बेटी ते कहौ, कि देखौ, तुम्हार राजा तुमरे पास आवत है। ऊ नम्र हवै, अउर गदहा पै बैठि हवै, बरन लादू के बच्चा पै!

⁶चेलन जाइके, जैसेन यीसु कहिन रहे, वैइसनै किहिन। ⁷अउर गदही अउर बच्चा का लाइके वहिपे आपनि कपड़ा डारेन, अउर ऊ वहि पै बैठि गवा। ⁸अउर बहुत लोगन आपनि कपड़ा रस्ता मा बिछाय दिहिन, अउर—अउर लोगन ने बिरवा केर डारि काटि के रस्ता मा बिछाय दिहिन। ⁹अउर जउन भीड़ आगे आगे जात, अउर पाछे—पाछे आवत रहे। ऊ गोहराय गोहराय के कहत रहै। दाऊद केर लरिका का होसन्ना, धन्य हवै ऊ जउन परभु के नाव ते आवत हवै, आकास में होसन्ना।

¹⁰जब ऊ यरुसलेम मां घुसा तब सगरे, नगर मा हल्ला होई गवा। अउर लोग कहै लागि, यू कउन है?

¹¹लोग कहिन ई गलील केर नासरत का यीसु आय।

मंदिर मां परवेस

¹²यीसु परमेसुर के मंदिर में जाइके, उइ सबका जउन मंदिर मां लेन देन करत रहै, निकारि दिहिन। सराफन के पीढ़े अउर कबूतर के बेचिवे बालेन केर चौकिन उलटि दिहिस। ¹³अउर उनते कहिसि लिखा हवै कि हमार घर पराथना क घर कहा जाई। अउर तुम यहिका डाकुन केर खोह बनावत हव।

¹⁴अउर आंधर, लंगड़ा मंदिर मां वहिके पास आये अउर ऊ उहिका ठीक किहिस। ¹⁵मुला जब महायाजक अउर सास्त्रीन ने ई अद्भुत कामन क देखिन जउन ऊ किहिस रहे। अउर लरिकन का मंदिर मां दाऊद केर लरिका केर होसन्ना गोहरावत देखिन, तब गुस्सा होइके उहिते कहिन का तुम सुनत हौ कि ई का कहत है?

¹⁶यीसु कहिन, हां; का तुम ई कबौ नाहीं पढ़यौ कि लरिकन अउर दूध पीवत बच्चन के मुहि ते तुमने स्तुति सिद्ध करायी।

¹⁷तब ऊ उनका छोड़िके नगर के बाहर बैतनिय्याह का गवा, अउर हुवै राति बिताइस।

बिना फलन केर अंजीर बिरवा

¹⁸भोर मां जब ऊ नगर का लौटत रहै, तब वहिके

भूख लागि।¹⁹ अउर अंजीर का एक बिरवा सड़क के किनारे देखिके ऊ वहिके नेरे गवा, अउर पत्तन का छोड़ि कै उहमा अउर कछु नाहिन पाइस। तब ऊ कहिस कि अब तुम कबौ ना फरिहौ। अउर अंजीर का बिरवा तुरन्तै सुखाय गवा।

²⁰ई देखि कै चले ने अचरज मा पड़िगै कि यू अंजीर का बिरवा काहे तुरन्तै झुगाय गवा?

²¹यीसु उनते कहिन कि हम तुमते सांच कहित है, यदि तुम बिसवासु रखौ, अउर संका न करेव तब न ई करिहौ, जउन अंजीर के बिरवा के साथे कीन गवा है; मुला यदि ई पहाड़ ते कहिहौ कि जाव उखरि जाव, अउर समुंदर मा जाइ गिरौ, तब ई हुइ जाई।²²अउर जउन कुछ पराथना मा बिसवासु मंगिहौ, ऊ सबै कुछ मिली।

यीसु केर अधिकारिन कै परसन

²³ऊ मंदिर मां जाइके उपदेसु देय लाग। तबै महायाजकन अउर लोगन के पुरनियन वहिके पास आइके पूछे लागि कि ई काम केहिका अधिकार ते करत हव, अउर तुमका यू अधिकार को दीन?

²⁴यीसु उनते कहिन, हम तुमते एक बात पूछित हैं, यदि ऊ वहिका बताव तो हमहू बताइब कि ई काम हम कहिके अधिकार ते करित हैं।²⁵यहुन्ना केर बपतिसमा कहां ते रहै? सरग की तरफ ते या मनइ केर तरफ ते रहे। तब उइ आपस मां लडै लागि कि यदि हम कहित कि सरग केर तरफ ते, तब उइ हमते कही कि फिर तुम उइकी बिसवास काहे नाहीं कियउ? ²⁶अउर यदि कहै कि मनइ केर तरफ ते तब हमका भीड़ ते डर है; काहे ते उइ सब यहुन्ना का भबिसवकता जानत हैं।

²⁷तब उइ बतावै लागि कि हम नाई जानित है, तब ऊ कहै लाग कि हमहू ना तुमका बतइवै कि ई काम हम केहिके अधिकार ते करित हैं।

दुइ बेटवन केर उदाहरन

²⁸तुम का समझत हौ एक मनइ के दुई लरिका रहै। ऊ पहिले के पास जाय कै कहिस है बचवा आजु दाख की बारी मा काम करौ।

²⁹उइ कहिस हम ना जइवै मगर बाद मा पछपाय केर गवा।

³⁰फिर ऊ दूसरे के पास जायकै वइसे कहिस ऊ कहिस हम जाइत हैं मुला गवा नाहीं।

³¹ई दुनौ मइहां कउन बाप केर इच्छा पूरी किहिस उइ कहिन पहिले ते यीसु कहिन, हम तुमते सांचु

कहित है चुंगी लैबेवाले अउर वैसया तुमते पहिले ते परमेसुर के राज मा जात है।³²काहे ते यहुन्ना धरम के मारग ते तोहरे पास आवा अउर तुम वहिका बिसबास नाहीं करेव, मुला चुंगी लैबेवाले अउर वैस्या वहिकी बिसबास किहिन, अउर तुम ई देखत भये पाछे नाहीं पछताने अउर वहिकी बिसवासु करि लेतिउ।

अंगूरे केर बगिया क मिसाल

³³एक अउर मिसाल सुनौ एक गरहस्थ रहै, ऊ अंगूर कै बारि लगाइसि अउर वहिके चरिउ तरफ बाड़ा वांचिसि अउर वाही मां रस का गड़वा खोदेसि, अउर गुम्मद बनाइस अउर किसानन का वहिका ठेका दै के परदेसु चला गवा।³⁴जब फल देय कै समै निकट आय गय तब ऊ अपने दासन का फल लिये के तई किसानन के पास भेजौ।

³⁵मुला किसान वहिके दासन का पकरि कै कउनेव मारेनए कउनेव कहियां मार डरिन अउर कउनेव का पथरवाह किहिन।³⁶फिर ऊ अउर दासन क पठाइस जउन पहिले ते गिन्ती मा ज्यादा रहै उइ अहू के बइसे किहिन।³⁷आखिर माऊ अपने लरिका का उनके पास पठइस यू कहिकि उइ हमरे लरिका का सतकारि करि है।

³⁸मुला उइ किसान वहिके लरिका का देखि कै आपास मा कहिन यू तो वहिका वारिस है आउ ई का मार डारी। अउर वहिकी मीरास लै लेई।³⁹अउर उइ वहिके लरिका का पकरि कै दाख की बारी ते बाहरे निकरि कै मारि डारिन।

⁴⁰यहिते जब दाख केर बारी का मालिक आई तब उइ किसानन के साथे का करी?

⁴¹वे उइते कहिस कि ऊ उइ दुस्ट किसानन का बुरी तरीके ते मारि है अउर दाख केर बारी कौ ठेका अउर किसान क दै देई। जउन समय पै फल दीन करिहै।

⁴²यीसु कहिन, का तुम कबऊ पवितर सास्र मां ई नाही पढ़ेव कि जउन पाथर कहयां थवई खराब समझिन रहै, वहै पाथर कोने पर लागि गवा।

⁴³यू परभु केर ओर ते भवा, अउर हमका देखे में अद्भुद् लागि यही लइ हम तुमते कहित है परमेसुर का राज तुमते लै लीन जाई अउर ऊ जउन वहिका फल लाई वहिका दीन जाई।⁴⁴जउन ई पाथर पै गिरी, ऊ चकनाचूर होय जाई, अउर ई पै ऊ गिरी वहिका पीस डारी।

⁴⁵महायाजक अउर फरीसी वहिके मिसाल सुनिके

समझेंगे कि ऊ हमारे बारे मा कहत है।⁴⁶अउर ऊ वहिका पकरै का चाहिन, मुला लोगन ते डेराय गये। काहे उइ वहिका भविसवकता जानत रहे।

बियाहे केर भोजु

22 यही पर यीसु फिर उदाहरन कहै लाग ²सर्ग का राज उइ राजा के समान है, जउन अपने लरिका केर बियाह किहिस।³अउर उइ अपने दासन का भेजिस कि बियाहु के दावत में नेवताहारियन क पठाइस; कि रिस्तेदारन का खाना खाय के तई बुलाय लउ मुला उइ आये नाही।

⁴फिर उइ अपने दासन का यू कहिकै पठाइस कि नेवताहारिन ते कहौ कि खाना तैय्यार होय गवा है। अउर हमार अउर पाले भवा जानवर मारे गये हैं, अउर सब कछु तैय्यार है, चलौ बियाह का खाना खाव।

⁵मुला वहिका परवाह न करिकै चला गये; कउनेव अपने खेत का, कउनेव अपने बेयोपार का।⁶अउर जउन बचे रहे वहिके दासन का पकरि कै बेइज्जती किहिन अउर मारि डारिन।⁷राजा गुस्सा करिके आपनि सेना भेजि कै उनका का मरवाय डारिस अउर उनके नगर का फुकवाय दिहिस।

⁸तब ऊ अपने दासन ते कहिस कि खाना तैय्यार है, मुला खाय वाले ठीक नाहीं हवै।⁹यहिते चौराहन पर जाव, अउर जेतने लोग मिलै, सबका बियाहे के खाना खाय के बोलाई लाव।¹⁰सो उइ दास सडक पै जायकें बुरे भले जेतने मिले सबका यकट्टा किहिन अउर बियाह का घर खायेव वालेन ते भरि गवा।

¹¹जब राजा खाये वालेन का देखै आवा तब ऊ देखिस एक मनइ का जउन बियाहे का कपड़ा नाहीं पहिरे रहे।¹²उइ उहिते पूछी, हे मित्र; तू बियाह का कपड़ा पहिरे बिना हियां काहे आयेउ, वहिका मुंह बन्द है गवा।

¹³तब राजा कहिस हाथ पांव बांधि कै बाहरै अधियारे मा डारि दियउ हुआं रोवै अउर दांत पीसै का होई।

¹⁴काहे ते बुलावे वाले बहुत अउर चुने हुए थोरेन हैं।

कर देय केर बारे मा

¹⁵तब फरीसीन ने जायकें आपस मा विचार किहिन कि यहिका बातन मां वइका फंसावा जाय।¹⁶सो उइ अपने चेलन का हेरोदियन के साथ वहिके पास ई कहिवे क भेजौ, कि हे गुरु; हम जानत हैं,

कि तू सच्चा है, अउर परमेसुर कौ माराग सच्चाई ते सिखावत है; अउर काऊ केर परबाहु नाहीं करै, काहे ते तू मनइन का मुंह देखिकें बात नाहीं करै।¹⁷यहिते हमका बताउ तुम का समझत हो? कैसर कर देवै ठीक है कि नाहीं।

¹⁸यीसु उनकेर दुस्टता देखिकें कहिन; हे धोखेबाजो हमका काहे परखत हव? ¹⁹कर का एक सिक्का हमका देयाव तब वे वहिके एक दीनार लै आये।²⁰उइ उन्ते पूछिस, ई मूर्ति अउर नाव केहिका आये?

²¹उइ कहिन, कैसर का; तब ऊ उन्ते कहिन, जउन कैसर का है, ऊ कैसर का, अउर जउन परमेसुर का है, ऊ परमेसुर क दियव।

²²ई सुनिकें उननें अचरज मा पड़ि गये, अउर वहिका छोड़ि कै चला गवा।

सदुकियन केर जवाबु

²³वही दिन सदूकी जउन कहत हैं कि मरे हुअन का फिरते उत्थान हुइयै नाई, वहिके पास आये, अउर उहिते पूछिन।²⁴कि हे गुरु, मूसा कहिन रहे कि यदि कोई बिना लरिका मर जाय तब उहिका भाई वहिकी मेहरिया ते बियाह करिकै आपन भाई केर बंस पैदा करे।²⁵अब हमरे हियां सात भाई रहे, पहिला बियाह करि के मरि गवा, अउर लरिका न हुअय के कारन अपनी मेहरिया आपन भाई खातिर छोड़ि गवा।²⁶जाई तिना ते दूसरे अउर तीसरे ने किया अउर सातों तक यहै भवा।²⁷सबके बाद वह मेहरिया मरि गई।²⁸सो जी उठै पै, ऊ उन सातन में ते, कउन केर मेहरिया होई, काहे ते ऊ सबकी मेहरिया बनि गय।

²⁹यीसु कहिन कि तुम पवित्र सास्त्र अउर परमेसुर केर ताकत नाहीं जानत हो यहै कारन तुम भूलि मां परि गयो।³⁰काहे ते जी उठिवे पै बियाह सादी न हुइहैं। मुला सर्ग के परमेसुर कै दूतन केर नाई हंड हैं।³¹मुला मरे हुए के जी उठय के बारे मा नाई पढ़ेव। जउन परमेसुर तुमते ते कहिन रहे।³²कि हम अबराम केर परमेसुर, अउर इसहाक केर परमेसुर, अउर याकूब केर परमेसुर आन। ऊ तौ मरेन का नाई मुला जिन्दा लोगन का परमेसुर है।

³³ई सुनिके लोग वहिकै उपदेस ते चकित होइगे।

यीसु केर महानतम आग्या

³⁴तब फरीसीन नें सुनी, कि उइ सदूकीन का मुंह बन्द करि दिहिस तो उइ यकट्टा भये।³⁵अउर उइमा ते एक बेवस्था जाने वाला परखै खातिर वहिते

पूछिन।

³⁶हे गुरु वेयवस्था मा कउन सी आसा बड़ी हुवै।
³⁷उइ कहिन तू परमेसुर आपन परभु ते अपने मन सारे अउर परान अउर सारे बुद्धि के साथे पिरेम रखौ।
³⁸बड़ी अउर खास आसा तो यह है।³⁹अउर वहिके समान या दुसरि है कि तू आपन पड़ोसी ते अपने समान परेम राखौ।

⁴⁰यई हुई असा सारी वेयवस्था जाने वाला अउर भविसवानी वालेन का आधार है।

यीसु दाउद केर लरिका

⁴¹जब फरीसी यकट्टे रहै, तब यीसु उनते पूछिन।
⁴²कि मसीह के बारे मा तुमका समझत ऊ कउन केर लरिका आय। उई कहिन दाऊद केर।

⁴³उइ उनते पूछिस, तब दाऊद आतमा मां होहिकै वहिका परभु काहे कहित है?

⁴⁴कि परभु कहिन हमरे परभु से दाहिने; बैठो, जब तक हम तुमरे दुसमनन को तुमरे पावन के नीचे न दबाय देई।

⁴⁵भला, जब दाऊद उइका परभु कहत है, तब ऊ वहिका लरिका कैसे भवा।⁴⁶वहिका यू जवाबु मां कि कउनो कुछ नाहीं कहि पावा मुला उइ दिन ते कउनो उहिते फिर कुछ पूछै कै हिम्मत नाहीं किहिस।

सात अफसोस

23 तब यीसु ने भीड़ ते अउर अपने चेलन ते कहिन।²सास्त्री अउर फरीसी मूसा केर गद्दी पै बैइठे रहैं।³यह की तई जउन उइ कहै वहै करी, अउर मानौ मुला उनके अइसन काम न करेव, काहे ते उइ कहत तौ हैं मुला करत नाहीं है।⁴उइ एक अइसन बोझ जउन उठाइब कठिन हवै, बांधिकै मनइ के कांधे पर रक्खत है मुला वहिका अपनी अंगुरी ते सरकावा भी नाई चाहत है।

⁵उइ अपन सब काम लोगन क दिखाई के तई करत हैं; उइ अपने तबीज चौड़े करत हैं, अउर अपन कपड़ा केर केर बढ़ावत हैं।⁶जेबनारों में खास खास जगह सभा मां खास आसन।⁷अउर बजारन का नमस्कार अउर मनइन मा रब्बी कहाउब पसन्द करत हैं।

⁸मुला तुम रब्बी न कहवायेन, काहे ते तुमरौ एकै गुरु है अउर तुम सब भाई आव।⁹अउर तुम धरती पै काऊ कं अपन बापू न कहेव, काहे ते तुमार एकई बाप सरग मां है।¹⁰अउर मालिक भी न कहवायेव, काहे ते तुम्हार एकै मालिक है मसीह।¹¹जौन तुममा बड़ा हुवै वहै तुमार सेवक बनै।¹²जउन अपने आप

का बड़ी बनइ वहिका छोट कीन जाई। जउन अपने आपका छोट बनइ वहिका बड़ा कीन जाई

¹³हे कपटी सास्त्रीन अउर फरीसीन तुम पर हाय! तुम मनइन के खिलाफ मां सरग के राज कौ दरवाजा बंद करत हव, न तौ तुमहिन वहिके अन्दर जात है।
¹⁴अउर जाय वालेन का जाय नाहीं देत हौ।

¹⁵हे कपटी सास्त्रीयो अउर फरीसीन! तुम पै हाय! तुम एक जनै का अपने मत मां लावै खातिर, सगरे जल अउर थल मा फिरत हौ अउर ऊ तुमरे मत मा आय जात है तब वहिका अपने ते फिरावत हौ।

¹⁶हे अन्धे अगुवो! तुम पर हाय यदि कौनु मंदिर केर कसम खाए तौ कछु नाहीं, अगर यदि कोउ मंदिर के सोने केर कसम खाय तौ ऊ वहिते बंधि जाई।

¹⁷हे भूखों अउर अंधों, कउन बड़ा है सोना या ऊ मंदिर जेहिते सोना पवित्तर होत है।¹⁸फिर कहत है कि यदि कोई बेदी केर कसम खाये तौ कछु नाई मुला जउन भेंट है वहिकी कसम खाये तौ ऊ वहिते बंधि जाई।¹⁹हे अन्धों कौन बड़ा है बेदी या भेंट जदने भेंट पवित्तर हुवत है।²⁰यही तई जउन बेदी केर कसम खात है ऊ बेदी की अउर जउन वहि पर है सककै कसम खात है।²¹अउर जउन मंदिर केर कसम खात है, ऊ वहिकी, अउर वहिमा रहे वाले कै सबकै कसम हुइ जात है।²²अउर जउन सरग केर कसम खात है, ऊ परमेसुर के सिंहासन केर अउर वहि पर बैइठे वाले केर ऊ कसम खात हैं।

²³हे कपटी सास्त्रीयो अउर फरीसीयो, तुम पै हाय! तुम पोदीना, सौफ अउर जीरे केर दसवां हिस्सा दियत है, मुला तुमने बेवस्था केर गम्भीर बातन की अरथात् नियाउ अउर दया, अउर बिसवासु का छोड़ि दिहेव है कि इनहूँ का करतै रहतू अउर उनहूँ का न छोड़तू।²⁴हे अन्धे अगुवो तुम मूसा का तौ छानि डारत हौ, मुला ऊँट का खाय जात हौ।

²⁵हे कपटी सास्त्रीयो, अउर फरीसीयो, तुम पै हाय! तुम कटोरा अउर थरिया का ऊपर—ऊपर तौ मांजत हौ, मुला भीतर गन्दगी अउर लोलुपता ते भरे हौ।²⁶हे अन्धे फरीसी, पहिले कटोरे का भीतर ते मांजौ तब ऊ बाहर ते ऊ साफ रही।

²⁷हे कपटी सास्त्रीयो, अउर फरीसीयो, तुम पै हाय; तुम चूना पुती भयी कबरन केर समान हौ, जउन ऊपर ते अच्छी दिखाई दियत है मुला भीतर मुर्दन केर हड्डी अउर सबै मेर केर गन्दी चीजों ते भरा हवै।²⁸यही मेर ते तुमऊ मनइन क ऊपर ते धरमी दिखाई देत हौ, मुला भीतर कपट अउर अधरम ते भरे हौ।

²⁹हे कपटी, सास्त्रीयों (नबी लोगन) अउर फरीसियों, तुम पर हाय! तुम भबिसवकतन केर कबरें संवारत हो अउर धरमिन केर कबरन बनावत हो। ³⁰अउर कहत हो कि यदि हम अपने बाप दादन के जमाने मा हुइत तौ भबिसवकतन केर हतिया मां हम साझी ना होइत। ³¹यहिते तौ तुम अपने आपै गवाही दियत हो कि हम भबिसवकतन का मारै वालेन केर सन्तान आव। ³²सो तुम आपन बाप दादन केर पाप का घड़ा भरि देव।

³³हे सांपों, हे करैतों, के बच्चों, तुम नरक की सजा ते काहे बचिहो। ³⁴यहि ते देखो, हम तुम्हरे पास भबिसवकतन बन अउर बुद्धिमान अउर सास्त्रिन का पठइत है अउर तुम उनमा ते कतनेन का मरिहो। अउर सूली पर चढ़इहो। अउर कतनेन का अपनी सभान मां कोड़ा मारिहो। अउर एक नगर ते दूसरे नगर मा भागत फिरिहो। ³⁵जइसे धरमी हाबील ते लड़कै विरिक्वाह के लरिका जकरयाह तक जिहका तुम मंदिर अउर बेदी केर बीच मां मार डारो, जतने धरमिन का लोहू धरती पै बहावा गवा है ऊ सब तुमरी खोपड़ी पै चढ़ी। ³⁶हम तुमते सांचु कहित है ई सब बातें इस समय केर लोगन पै आय परिहें।

³⁷हे येरुसलम, तुम जउन भबिसवकता का मारि डारेव हो। अउर जउन तुम्हरे पास पठयेन गये है उनका पथरवाह करत हो कतनी बार चाहेन, कि जइसे मुरगी अपने बच्चन का अपने पंखन के नीचे बैठावत है वइसे तुमरे लरिकन का यकट्टे कर लेई मुला तुम नाहीं चाहेव। ³⁸देखो तुमार घर तुमरे खातिर उजाड़ छाड़ि दीन जात है। ³⁹काहे ते हम तुमते कहित हवै कि अब ते जब तक तुम न कहिहो कि धन्य है ऊ जउन परभु के नाव ते आवत है; तब तक तुम हमका फिर न देखि पइहो।

आखिर समय मा युगअन्त केर निसान

24 जब यीसु मंदिर ते निकरि कै जात रहै, तो वहिके चले वहिके मंदिर कै रचना दिखावै खातिर वहिके पास आये। ²उइ उनते कहिस का तुम ई सब नाई देखत हो हम तुमते सांचु कहित है हियां पाथर पै पाथर न छूटिहै जउन कि गिरावा नाहीं जायगौ।

³अउर जब ऊ जैतून केर पहाड़ पै बैइठा रहै तौ चेलन ने वहिके पास आयके कहिन, हमते कहौ कि ई बातें कब हुइहैं। अउर तुमरे आबै का अउर संसार कै नासु हवै केर कउन निसान होई।

⁴यीसु उनते कहिन हुसियार रहेव केउ तुमका भटकावै न पावै। ⁵काहे ते बहुत ते ऐसेऊ हुइहैं जउन हमरे नाव ते आयके कहिहैं कि हम मसीह हन, अउर बहुतन का भरमइहैं। ⁶तुम झगड़ा अउर झगड़न केर चरचा सुनिहो देखेव घबरायेव न काहे ते ई होइ है जरूर मुला उई समय आखिरी न हुई। ⁷काहे ते जाति पर जाति, अउर राज पै राज चढ़ाई करी अउर जगह—जगह अकाल परी, अउर भूईडोल (भूचाल) होई। ⁸ई सब बातें कस्टन केर सुरूआत होई।

⁹तब उइ कस्ट दियय केर तई तुमका पकरिहैं, अउर तुमका मारि डारि है अउर हमरे नाव के कारन सब जातिन केर लोग तुमते दुसमनी रखि है। ¹⁰तब बहुतेरे ठोकर खइ है अउर एक दूसरे का पकरिवइहैं अउर एक दूसरे ते दुसमनी रखि है। ¹¹अउर बहुत झूठे भबिसवकता उठि ठाड़े होइहैं अउर बहुतन का भरमइ है। ¹²अउर अधरम के बड़े ते बहुतन कै परेम ठंडा हुई जाई। ¹³मुला जउन आखिरी तक धीरज धरै रही वहिका उद्धार होई। ¹⁴अउर राज का ई सुसमाचार सगरे संसार मां परचार कीन जाई सब जातिन पे गवाही हुवय तब आखीर आई।

¹⁵“सो जब तुम उइ उजाड़यवाली घिरनित सामान” का जेहिकी चरचा दानियेल किहिस रहा पवित्तर जगह मां ठाड़ी हुवै देखै। ¹⁶तबु जउन यहूदिया मां उइ पहाड़न पै भागि जाय। ¹⁷जउन कोठरी पै हुवै उइ अपने घर ते सामान लावै का न उतरें। ¹⁸अउर जउन खेत मां उइ अपन कपड़ा लइके पाछे न लउटे। ¹⁹उइ दिनन मां जउन गरभवती अउर दूध पियवती हुवै, उनके लिये हाय, हाय। ²⁰अउर पराथना कीन करे कि तुंहका जाड़े मा सबत के दिनन मां भागै का न परै। ²¹काहे ते उइ समय अइस भारी संकट परी जइसा दुनियां सुरु भये ते अबही तक नाई परा है अउर न कबहुँ होई। ²²अउर यदि उई दिन घटावा न जाई तौ कउनो परानी नाई बच पावत, मुला चुने भयेन के कारन उइ दिन कम कीन जाई। ²³उइ समय का कउनो तुमते कहै कि देखव कि मसीह हियां हवै या हुआं है, तब मानेव या। ²⁴काहे ते झूठे मसीह अउर झूठे भबिसवकता खड़े हुइहैं अउर बड़ा चीन्ह, अउर अद्भुद काम दिखइहैं कि यदि होइ सका तब चुनेन हुवन का भी भरमाय दिहैं। ²⁵देखो, हम तुमते ई सब पहिलेन तेइ कहि देय रही।

²⁶यहिते यदि उइ तुमते कहय कि देखो अई जंगल मां है, तब बाहर न निकरि जायव, देखो ऊ कोठरी मां है, तब मानेव न। ²⁷काहे ते जइसन बिजरी पूरव ते निकरि कै पच्छिम तक चमकत जात बैसेई मनइ

केर लरिका का आवय का होई।²⁸जौनी जगह लास हुई हुवयं गिद्ध यकट्टे हईहैं।

²⁹उन दिनन क दुख के बाद तुरन्तय सूरज अंधेरे मा हुई जाई। अउर चंदरमा केर उजेर खतम होइ जाय। अउर नखत आकास ते गिरि परिहैं, अउर आकास केर सक्तियां हिलाई जइहैं।

³⁰तब मनइ केर लरिका का चिन्ह आकास मा दिखाई परी अउर धरती के लोगन छाती पीटि हैं अउर मनइ के लरिका का बड़ी महिमा अउर वैभव के साथे आकास के बदरन पै आवत देखिहैं।³¹अउर ऊ तुरही के बड़े सबद के साथे, अपने दूतन का पठाई अउर उइ आकास के परभु ते उइ छोर तक अपने चुने हुवन का यकट्टा करि हैं।

³²अंजीर के बिरवा ते ई मिसाल सीखौ, जब अंजीर केर डार कोमल हुइ जात है, अउर पतवा निकरै लागत है। तब तुम मान लियत हव कि गरमी काल निकट है।³³जाई रीति ते जब तुम इन बातन क देखौ, तौ जान ल्यो कि ऊ निकट है, वरन द्वार पैई है।³⁴हम तुमते सांची कहूँ हूँ, कि जब तक ई सब उहितें पूरी नाहीं होयलें, तब तक, ई पीढ़ी समाप्त नांय होय।³⁵आकास अउर धरती टरि जइहैं, पर मुला हमारु कहा न टरी।

अकसमिक दिनु व घरी

³⁶उई घरी के बारे मा कोऊ नाहीं जानत है। सरग केर दूत न लरिका मुला केवल बाप ही जानत है।³⁷जइसन नूह के दिन रहै वइसे मनइ के लरिका का आवै का भी होई।³⁸काहे ते जइसन बाढ़ के दिनन मा जउन दिन तक नूह जहाज पर नाहीं चढ़ा, वतने दिन तक लोग खात—पियत रहे। अउर उनका वियाह सादी होत रहै।³⁹अउर जब तक बाढ़ उनका बहाय नाहीं लइग तब तक उनका कुछू मालूम नई परावइसेन मनइ कै लरिका आवै का परी।⁴⁰ऊ बखत दुइजन खेत मां हुइहैं एक लै लीन जाई दूसर छोड़ि दीन जाई।⁴¹दुई मेहरारू चक्की पीसती हुइ है। एक लै लीन जाई अउर दूसरि छोड़ि दीन जाई।

⁴²यही तई जागत रहेव काहे ते तुम नाहीं जानत हव कि तुमारा परभु कउने दिन आई।⁴³मुला ई जान लियव कि घर का मालिक जानत हुवै कि चोर कउने समय आई तौ ऊ जागत रही अउर अपने घर मां सेंध न काटे देई।⁴⁴यही तई तुमहू तैय्यार रहौ, काहे ते जउन घड़ी खातिर तुम सोचत नाहीं हव वही घरी मां मनइ का लरिका आइ जाई।

⁴⁵सो ऊ विसबासु योग अउर उद्धिमान दास कउन हवै जउने क मालिक नौकर का मुखिया बनाईस है कि बखत पर उनका खाना दियय।⁴⁶धन्य हवै, ऊ दास, जउने कै ऊका मालिक अइसन करत पावै।⁴⁷हम तुमते सांचु कहित हैं ऊ वहिका अपनी सगरी जायदाद का सरदार बनाई।⁴⁸मुला ऊ दुस्त दास सोचै लागे कि हमरे मालिक का आवै मा देर हवै।⁴⁹अउर अपने साथी दासन का पीटे लागै अउर पियक्कड़न के साथे खाय—पीबै।⁵⁰तब उइ दास का मालिक अइसे दिन आई जौनु दिन ऊ मालिक कै रासता न देखत होई।⁵¹अउर ऐसी बखत मां ऊ न जानत होय अउर वहिका भारी सजा दइकै वहिका हिस्सा कपटीन के साथ उहवाई जाई उहां रोवउ अउर दांत पीसव होई।

दस कुँवारिन केर उदाहरन

25 तब सरग का राज उई दस कुँवारिन केर समान हुइ है। जउन अपनी मसालें लेइ के आपने दूलहा ते मिलै के तई निकरीं।²उनका पांच मूरख रही अउर पांच समझदार रहीं।³मूरख अपनी मसालें तौ लै लिहिन, मुला अपने साथे तेल नाहीं लाइन।⁴मुला समझदारन मसालै लिहिन अउर अपने साथिन कुष्पी में तेल लै लिहिन।⁵जब दुलहा के आवे मां देर भये, तब उइ सब ऊँघाय लागीं अउर सोय गइन।

⁶रात मा धूम मची कि देखौं दुलहा आवत हैं। वहिते मिले के तई चलव।

⁷तब उइ सब उठि कै अपनी मसाले ठीक करै लागी।⁸अउर मूरख वाली कहै लागीं कि अपने तेल मा ते कुछ हमहू का दै द्यो काहे ते हमरी मासलें बुतान जात हैं।

⁹मुला समझदार वाली कहै लागीं कि इव हमरे तुम्हरे मा पूरा ना होई। अच्छा तो ई है कि तुम बेचइ वालेन के पास तै लै आव।

¹⁰जब उइ खरीदे हीं रहें तब तक दूलहा आइ गवा। अउर जउन तैयार रहैं वै वियाह करि घरे मा चलि गई। अउर दुवार बन्द होइ गवा।

¹¹यहि के बाद उई दूसरी कुंवारी आइ के ई कहै लागि। हे मालिक, हे मालिक हमरे तई दुवार खोलि दियौ।

¹²ऊ उनते कहिसि हम तुमते सांचु कहित हवै कि हम तुमका नाहीं जानित है।

¹³यही की तई जागत रहौ, काहे ते न तुम उइ दिन का जानत हौ न उइ बखत का।

पांच तोड़न केर उदाहरन

¹⁴काहे ते ई ऊ मनइ की दसा है जउन परदेस जात समय अपने दासन का बुलाइके अपनी दौलत उनका सौंपि दिहिस। ¹⁵ये एक का पांच तोड़ा, दूसरे का दुई, तीसरे का एक। यानी जौन जैसे रही वैसे दिहिस। अउर ऊ परदेस चला गवा। ¹⁶तब जउन का पांच तोड़ा मिले रहे, ऊ जाय के वहिते लेन देन करै लागि अउर पांच तोड़े कमाई लिहिस। ¹⁷यही मेर जउन ते जउन का दुई तोड़े मिले रहिस, वही दुई अउर कमाइस। ¹⁸मुला जिन्हका एकु मिला रहै, उइ जायके माटी खोदिस, अउर अपने मालिक केर रुपय्या छिपा दिहिस।

¹⁹बहुत दिनन बाद उइ दासन का मालिक आअके लेखा हिसाव लैवे लागि। ²⁰जउने का पांच तोड़े मिले रहै ऊ पांच तोड़े अउर लायके कहिस, हे मालिक, तुम हमका पांच तोड़ा दिहेव रहव, हम पांच अउर कमायेन।

²¹वहिके मालिक वहिते कहिस, धन्य हो अच्छे अउर बिसासु जोग दास, तू थोरन बिसवासी। हम तुमका बहुत सामानन का अधिकारी बनाइव, अपने मालिक के सुख मां सम्भागी रहौ।

²²अउर जउने का दुई तोड़ा मिले रहे उइ आइके कहे लागि हे मालिक तुम हमका दुई तोड़ा दिहेव रहौ अउर हम दुई तोड़ा अउर कमायेन।

²³वहिके मालिक वहिते कहिस धन्य हो अच्छे अउर बिसवासु जोग दास तू थोड़े मा बिसवासु जोग रहेव, हम तुमका बहुत सामानन का अधिकारी बनाइव अउर अपने मालिक के सुख मां हिस्सेदार होव।

²⁴तब जौन का एक तोड़ा मिला रहै ऊ आयके कहे लागि हे मालिक हम तुमका जानित है कि तू कठोर मनइ है तू जहां नाहीं बोवत हुवां काटत हव, अउर जहां नाहीं छोटत है ऊहां तुम बटोरत हौ। ²⁵यही तई हम डैराय गयेन अउर तोहार तोड़ा लै जाय के हम मिट्टी मां छिपाय दीन द्याखव जउन तुम्हार आयऊ है।

²⁶वहिका मालिक उससे उत्तर दिहिस, हे दुस्त अउर आलसी दास; जब तू सब जात रहै कि हम जहां नाहीं बोइत है हुआं काटित है अउर जहां नाहीं छोटित है हुआं बटोरित है। ²⁷तब तुमका चाहत रहा कि हमार रुपय्या (तोड़ा) सराफन क दै देतव अउर हम आयके आपन रुपया बियाज समेत लेई लेत।

²⁸यही की तई ऊ तोड़ा, वहिते लै लियो, अउर जेहिके पास दस तोड़ा रहै उहिके दै देव। ²⁹काहे ते

जउने के पास हुवै वहिका अउर दीन जाय। अउर वहिके पास बहुत होय जाई मुला जेहि के पास नाहीं है अउर ऊ जउन कछु वहिके पास है लै लीन जाई।

³⁰अउर ई निकम्मे दास क इहां बाहर अंधेरे मां डारि दियव, उहां ई रोवै अउर दांत पीसै का परी।

नियाड केर दिन

³¹जब मनइ का लरिका अपनी महिमा मां आई अउर सब सरग केर दूत वहिके साथ अइहै तब ऊ अपने महिमा के सिहांसन पर विराजी। ³²अउर सब जाति वहिके सामने यकड़ा कीन जाई। अउर जइसन चरवाहा भेड़न का बकरिन ते अलग करि देत है, वैसे ही ऊ उनका एक दूसरे ते अलग करि देई। ³³अउर ऊ भेड़न का अपनी दाहिनी ओर अउर बकरिन का बायीं ओर खड़ा करी।

³⁴तब राजा अपनी दाहिनी ओर वालेन ते कही हे हमरे बापू के धन्य लोगउ आऊ अउर उइ राज केर अधिकारी हुइ जाव जउन जगत के पहिले ते तुम्हरे खातिर तैय्यार कीन गवा। ³⁵काहे ते हम भूखे रहव अउर तब तुम हमका खाना दिहेव; हम पियासे रही अउर तुम हमका पानी पिलाये। हम परदेसी रहव अउर, तब तुम हमका अपने घर मां राखेव। ³⁶हम नंगे रही तब तुम हमका कपड़ा पहिरायेव; हम बीमार रही तब तुम हमरी सेवा किहेव हम जेल मां रही तब तुम हमका मिलिय आयेव।

³⁷तब धरमी वहिका जवाबु देहै कि हे परभु हम कब तुमका भूखा देखेन या पियासा देखिन अउर पिलायेन? ³⁸हमने कब तुमका परदेसी देखे अउर अपने घर मां राखेन। या नंगा देखेन या कपड़ा पहिरायेन। ³⁹हम कब तुमका जेल मा देखे अउर तुमते मिले गयेन।

⁴⁰तब राजा जवाबु देयी कि हम तुमते सांचु कहित हय कि तुम जउन हमरे छोटे-छोटे भाइन उइ ते कउनउ एक के साथे किहेव, वहै हमरे साथे किहेव।

⁴¹तब ऊ बाईं ओर वालेन ते कही, हे सरापित लोगौ, तुम हमरे सामने ते उइ अनन्त आगि मां चले जाव जउन सैतान अउर वहिके दूतन खातिर तैय्यार कीन गवा है। ⁴²काहे ते हम भूखी रही अउर तुम हमका खाय का नाहीं दिहेव हम पियासे रही हमका पानी नही दिहेव। ⁴³हम परदेसी रहेन तुम हमका अपने घर मां नाहीं राखेव, हम नंगे रही तुम हमका कपड़ा नाहीं पहिनायेव हम बीमार अउर जेल मां रही अउर तुम हमसे नाहीं मिलेव।

⁴⁴तब उइ जवाबु देहय कि हे परभु हम तुमका

कब भूखा, पियासा, अउर परदेसी, नंगा या बीमार या जेल मां देखेन, अउर तुमार सेवा टहल नाहीं कीन।

⁴⁵तब ऊ उनका जवाबु देई कि हम तुमते सांचु कहित है कि तुमने जउन इन छोटन मइते कउनउ एक के साथे नाहीं किहेव ऊ हमरे साथे नाहीं किहेव।

⁴⁶अउर ई अनन्त सजा भोगिहैं मुला धरमी जन अनन्त जीवन मां परवेस करिहैं।

यीसु केर खिलाफ सडयन्त्र

26 जब यीसु ई सब बातें कहि चुकै तब अपने चेलन ते कहै लागे। ²तुम जानत हो कि दुई दिन बाद फसह केर परब होई अउर मनइ का लरिका सूली पै चढ़ावै के तई पकरवावा जाई।

³तब महायाजक अउर परजा के पुरनियां काइफा नाम केर महायाजक के आंगना मां यकड़ा भये। ⁴अउर आपस मां विचार करै लागै कि यीसु का धोखे ते पकरि के मारि डारै। ⁵मुला उइ कहत रहै कि पर्व के समय नाहीं कहूँ अइसन हुइ जाय कि लोगन मां बलवा मच जाय।

बेतनिय्याह मां यीसु केर स्वागत

⁶जब यीसु वैतनिय्याह मां सिमौन कोड़ी के घर मां रहे। ⁷तब एक अउरत संगमरमर के बरतन मां महंग इतर लइके वहिके पास आई अउर जब ऊ खाना खाय बइठा तब वहिके खोपड़ी पर उडेल दिहिस।

⁸ई देखिके वहिके चेला गुस्साने अउर कहै लागै ई का काहे नास कर दिहेव। ⁹ई तउ अच्छे दामन में बेचि कय कंगालन मां बांटा जाय सकत रहै।

¹⁰ई जानि के यीसु उनते कहिन मेहरिया का काहे सतावत हव ई हमरे साथे भलाई किहिस हवै। ¹¹कंगाल तुम्हरे साथे हमेसा राहत हय मुला हम हमेसा तुमरे साथ न रहेव। ¹²ई हमरी देही पर जउन इतर डारिस है वह हमरे गाड़े जाय तई कीन है। ¹³हम तुमते सांचु कहित है कि सगरी दुनियां मां जहां कहूँ ई सुसमाचार परचार कीन जाई हुआं वहिके ई काम का बखान भी होई वहिकी याद मा।

यहुदा केर विसवासघात

¹⁴तब यहुदा इस्करियोती नाम केर बारह चेलन मां ते एक महायाजकन के पास जायके कहिस। ¹⁵हम वहिका तोहरे हाथे पकरवाय देई तब हमका का देहव? उइ वहिका तीस चांदी केर सिक्का तौलि कै

दे दिहिन। ¹⁶अउर ऊ वही समय ते वहिका पकरावै का अवसर ढूँढे लागै।

आखिरी भोज

¹⁷अखमीरी परब पर पहिले दिन चेला आय कय पूछे लागि तुम कहां चाहत वह कि हम तुम्हरे खातिर फसह खाय केर तैय्यारी करी?

¹⁸उइ कहिन नगर मां जाय कय फलाने ते कहब कि गुरु कहत है कि हमार समय आय गवा है हम अपने चेलन के साथे तुम्हरे हियां परब मनइवै। ¹⁹सो चेला यीसु केर आग्या मानिन अउर फसह तैय्यार किहिन।

²⁰जब संझा भई, तब ऊ बारहो के साथे खाय के तई बइठ। ²¹जब सब खात रहै तब उइ कहिन कि तुममा ते एकु हमका पकरवाई। बारहों के साथे खाय के तई बइठ।

²²यहि पर उइ सब उदास होइगे अउर उनते पूछय लागे कि हे गुरु का ऊ हम आन?

²³उइ जवाबु दिहिन कि जउन हमरे साथ थरिया मइहां हाथ डारिस हय वहै हमका पकराई। ²⁴मनइ का लरिका जइसन वहिके बारे मां लिखा जात है मगर उइ मनइ की तई सोक हवै जेकरे द्वारा मनइ का लरिका पकरावावा जाय यदि उइ मनइ का जनम न हुवत तकौ अच्छय हुआत।

²⁵तब वहिका पकरावै वाला यहुदा कहिस, का ऊ हम आन?

²⁶उइ उहिते कहिन, तू कहि चुके हव जब ऊ खाय रहे रहय तव यीसु रोटी लिहिन अउर आसीस मांगि कय तूरिन अउर चेलन का दइके कहिन, लियव खात ई हमार देह आय है।

²⁷फिर उइ कटोरा लइके धन्यवादु किहिन अउर उनकउ दइके कहिन तुम सब ई मा ते पियव। ²⁸काहे ते ई बाचा कय हमार ऊ खून आय जउन बहुतन की तई पापन के माफु की तई बहावा जाई। ²⁹हम तुमते कहित है कि दाख का यह रस उइ दिन तक कबहूँ न पियव जब तक तुमरे साथे अपने बापू के राज में नवान पी।

³⁰फिर उइ भजन गाय कय जैतून पहाड़ गै।

चेलन केर पतन केर भबिसवानी

³¹तब यीसु उनते कहिन, तुम सब आजु रात हमरे बारे मा धोखा खइहौ काहे ते लिखा हय कि हम चरवाहे का मरबै; अउर झुंड केर भेड़ें तितर बितर होइ जइहैं।

³²मुला हम अपने जी उठै के बाद, तुमते पहिले गलील का जइबै।”

³³पर पतरस उनते कहिन यदि तोहरे बारे मा सब ठोकर खाइहैं त खायं मुला हम कबहू न ठोकर खइबैं।

³⁴यीसु कहिन हम तुमते सांचु कहित हय कि आजु रात मा मूरगा के बांग दैबे ते पहिले तुम हमते तीन बार मुकरि जइहौ।

³⁵पतरस उनते कहिन यदि हमका तोहरे साथे मरहौ का परै तबौ हम न मुकरबय अउर अइसन सब चेला भी कहिन।

गतसमनी बगीचे मां

³⁶तब यीसु अपने चेलन के साथे गतसमनी नामक स्थान पर गये अउर चेलन ते कहिन तुम सब हियन बइठे रहेव जब तक कि हम हुआं जाय कय पराथना करी। ³⁷अउर ऊ पतरस अउर जब्दी के दूनौ बेटवा का साथे लै गवा अउर उदास अउर व्याकुल होय लाग। ³⁸तब ऊ उनते कहिन, हमार जी बहुत उदास हवै हिया तक कि हमार परान निकरा चाहत हय तुम हियां रुकव अउर हमरे साथे जागत रहेव।

³⁹फिर ऊ थौड़ा आगे बढ़िकय मुहि के बल गिरा अउर यह पराथना करय लागि कि हे हमरे बापू यदि होय सकै तौ ई कटोरा हमते टरि जाय, तोही पर जइसन हम चाहित है वइसन नाहीं मुला जइस तुम चाहत हव वइसै हुवय।

⁴⁰फिर चेलन के पास आवा अउर ऊ उनका सोवत पाइस अउर पतरस ते कहिन, का तुम हमरे साथ एकै घड़ी नाहीं जागि सकेव।

⁴¹जागत रहन अउर पराथना करति रहब कि तुम परिच्छा मां न परौ, आतमा तो तैय्यार है, मुला सरीर कमजोर आय।

⁴²फिर उइ दूसरी बेर जायकय ई पराथना किहिन कि हे हमरे बापू यदि ई हमरे पिये बिना नाहीं हटि सकत तब तोहार इच्छा पूरी हुवय।

⁴³तब उइ आय कै उनका फिर सोवत पाइस काहे ते उनकी आंखे नींद ते भरी रहैं। ⁴⁴अउर उनका छोड़ि कै फिर चला गवा अउर वहय बात कहिकय पराथना किहिस।

⁴⁵तब ऊ चेलन के पास आयके उनते कहिन, अब सोवत रहव अउर आराम करब देखौ, घड़ी आय पहुंची हय अउर मनइ का बेटवा के पापीन के हाथ पकरावा जात हय। ⁴⁶उठव चलव देखौ, हमका पकरावै वाला पास आय गवा है।

यीसु केर बन्दी

⁴⁷ऊ ई कहतै रहै कि देखौ यहूदा जउन बारहौ चेलन मां ते एक रहै आवा अउर वहिके साथे महायाजक अउर लोगन के पुरनियां केर तरह ते बड़ी भीड़ तलवार अउर लाठी लइकै आई। ⁴⁸वहिका पकरावै वालो ई पता दिहिस रहै कि जेहिका हम चूमि लेई वहै यीसु है; वहिका पकरि लिहेव। ⁴⁹अउर तुरन्त यीसु के पास आय कय कहिस हे रब्बी नमस्कार अउर वहिका बहुत चूमिस।

⁵⁰यीसु वहिते कहिन हे मित्र, जौने काम तई तू आये हव वहिका कर लियव हव ऊ पास आवा अउर यीसु पै हाथ डारिस, अउर उनका पकरि लिहिस। ⁵¹अउर देखव ई यीसु के साथिन में ते एक हाथ बढ़ाय कय अपनी तलवार खींच लिहिस अउर महायाजक केर दास पर चलाय कय उहिका एक कान उड़ाय दिहिस।

⁵²तब यीसु वहिते कहिन अपनी तलवारू म्यान मां रख लियव काहे ते जउन तलवारू चलावत हय, हुइ सब तलवारू ते नास किहे जइहैं। ⁵³का तुम नाई समझत हय कि हम अपने बापू ते बिनती कर सकित, अउर ऊ सरग दूतन केर बारह पलटन तेऊ अधिक हमरे पास अबई हाजिर करि देई। ⁵⁴मुला पवित्तर सासतर केर उइ बातें कि अइसन होई अउर कइसे पूरी हुइहैं।

⁵⁵वही बखत यीसु भीड़ ते कहिन, का तुम तलवार अउर लाठी लइकै हमका डाकू के समान पकरै निकरे हव। हम हर रोज मंदिर मां बइठके उपदेस दिया करत हव, अउर तुम तब मोय नाहीं पकरौ। ⁵⁶मुला ई सब यहिकी तई भवा कि भबिसवकतन कै बचन पूरै हुवै। तब वहिके सब चेला वहिका छाड़ि कै भागि गै।

महापुरेहितन केर सामने

⁵⁷अउर यीसु का पकरे वाले उइका काइफा नाम के महायाजक के पास लै गय। जहां सासतरी अउर पुरनिये यकट्टे भये रहय। ⁵⁸अउर पतरस दूर ते वहिके पाछे—पाछे महायाजक के अंगना तक गवा अउर भीतर जायकै अन्त देखै खातिर चेलन के साथ बइठ गवा।

⁵⁹महायाजक अउर सगरी महासभा यीसु का मारि डारे के ताई वहिके खिलाफ में झूठी गवाही केर खोज मां रहय। ⁶⁰मुला बहुत ते झूठे गवाही के आवे पर भी नाई पाइन। ⁶¹अन्त मां दुई जने आयके कहिन कि ई कहिस है कि हम परमेशुर केर मंदिर का गिराय

सकत हैं। अउर वहिका तीन दिन मा बनाय सकित हैं।

⁶²तब महायाजक खड़ा होइकै वहिते कहिन का तुम कउने जवाबु देहौं? ई लोग तुमरे खिलाफ मां का गवाही दियत हैं। मुला यीसु चुप रहा; महायाजक वहिते कहिस। ⁶³हम तुमका जीवित परमेसुर केर कसम देइत है कि यदि तुम परमेसुर के लरिका मसीह हुवै तो बताइ देव।

⁶⁴यीसु उनते कहिन, तुमतौ कह दिहेव वरना हम तुमते यही कहित है कि अब ते तुम मनइ के लरिका का सबसक्तिमान की दाहिनी ओर बइठे। अउर आकास के बदरन पर आवत देखिहव।

⁶⁵तब महायाजक अपना कपड़ा फारिकै कहिस कि ई परमेसुर केर निन्दा करत है अब हमका गवाही के जरूरत नाहीं है। ⁶⁶देखौ, तुमने अबै ई निन्दा सुनेव है। तुम का समझत हव? उई जवाबु दिहीन उई मारे के काबिल हवै।

⁶⁷तब उइ वहिके मुहि पर थूकिस अउर वहिका घूसा मारिन, अउर थप्पर मारि कै कहिन। ⁶⁸हे मसीह, हमते भविसयवानी करके कहव कि तुमका कौन मारिस?

पतरस केर इनकार

⁶⁹अउर पतरस बाहर आंगन में बैठि रहै कि एक लवन्डी आइके कहिसि तुमहू यीसु गलीली केर साथे रहेव।

⁷⁰ऊ सबके सामने ई कहिके इनकार किहिस अउर कहिस कि हम नाहीं जानित हइ कि तुम का कहि रही हौ?

⁷¹जब ऊ बाहर डेवढी मा चला गवा, तब दूसरी मे वहिका देखिकै उनते जउन हुवां रहै कहिस, यही तब यीसु नासरी के साथे रहव।

⁷²ऊ कसम खायकें कहिस कि हम उइ मनइ का नाहीं जानत हैं।

⁷³थोरी देर केर बाद जउन हुवां पै ठाड़े रहै उइ पतरस के पास आयके कहिन। सांचैही तुमहू उनमा ते एक हव, काहे ते तोहार बानी तुम्हार भेद खोलि दिहिस हन।

⁷⁴तब पतरस ऊ धिक्कारे लागि अउर कसम खाये लाग कि हम उइ मनइ का नाहीं जानित है। अउर तुरंत मुरगा बांग दिहिस। ⁷⁵तब पतरस का यीसु केर कही बात याद आइ गय कि मुरगा के बांग दैबे ते पहिलें तुम तीन बेर हमार इनकार करिहौ अउर ऊ बाहर जाय कै फूटि-फूटि कय रोवै लाग।

यहूदा इस्करियोति द्वारा आत्महत्या

27 जब भोर भय तब महायाजक अउर लोगन के पुरनिया यीसु का मारि डारै का सलाह किहिन। ²अउर उई वहिका बाँधिन अउर लइ जाय कय पीलातुस हाकिम के हाथ मा सौंपि दिहिन।

³जब वहिका पकरावय वाले यहूदा ई देखिस कि वहिका अपराधी करार दै दिहिन तब ऊ पछतान अउर उइ तीस चांदी केर सिक्का महायाजक अउर पुरनियन के पासे लावा। ⁴अउर कहिस हमने निरदोस के पकराय कय मारै तई पाप किहे हन। उई कहिन हमका तुम जानव।

⁵तब ऊ उन सिक्कन का मंदिर मां फेंकि दिहिस अउर जाय कै अपने आपके फांसी लगाय लिहिस।

⁶महायाजक उई सिक्कन का लइकै कहिन कि इनका भंडार मा रखब ठीक नहीं, हवै काहे ते ई इनका दाम आय। ⁷सो उइ उन सिक्कन ते परदेसिन का गाई खातिर कुम्हार का खेत मोल लै लिहिन। ⁸यहि कारन ते ऊ खेत आज तक लोहू केर खेतवा कहिलावत हये। ⁹तब जउन बचन यरमयाह भविसवकता कहिस रहै ऊ पूरा भवा कि उन्होने वै तीस सिक्का लै लिहिन। ¹⁰अउर जइसे परभु हमका आग्या दिहिन रहै वइसन ही हम उनका कुम्हार के खेत के मूल्य मा दै दीन।

पीलातुस केर सामने यीसु

¹¹जब यीसु हाकिम के सामने खड़ा रहै तब हाकिम वहिते पूछिस कि का तुम यहूदीन केर राजा हव? यीसु वहिते कहिन कि तू अपने आपै कहत हौ।

¹²जब महायाजक अउर पुरनियां वहिपै दोसु लगावत रहै तब ऊ कुछ जवाबु नाहीं दिहिस। ¹³ई पै पीलातुस कहिस का तुम नाहीं सुनत हव कि ई तुम्हरे खिलाफ मां केतनी गवाही दियत है? ¹⁴मुला उइ वहिकी एकु बात कउ जवाबु नाहीं दिहिस; हियां तक हाकिम कउ अचरज होइगै।

¹⁵अउर हाकिम केर ई रीति रहै, कि उई पर्व या लोगन खातिर एक बंधुआ छाड़ि दीन जात रहै जेहिका उइ चाहत रहै। ¹⁶वही बखत मा बरअब्बा नाम का वनहिन मां एक नाम बंधुआ रहै। ¹⁷सो जब उई यकड़ा भये तब पीलातुस कहिस तुम केहिका चाहत हव वहिका हम छाड़ि देई? बरअब्बा का या यीसु का जउन मसीह कहावत है? ¹⁸काहे ते ऊ जानत रहै कि वहिका जलन के मारे पकरावा गवा है।

¹⁹जब ऊ नियाउ केर गद्दी पै बैठा रहै तब वहिकी मेहरिया कहवाय पठाइस कि तुम उई धरमी के बारे

मा हाथ न डारेउ; काहे ते हम आजु सपना मां वहिके बारे मा बहुत दुख उठायन है।

²⁰महायाजक अउर पुरनिया ने लोगन का उकसाइन कि बरअब्बा का भागेउ अउर यीसु के नासु कराय दियव।

²¹हाकिम पूछिस केहिका तोहरे खातिर छाड़ी, तब उइ सब कहिन बरअब्बा का।

²²पीलातुस उनते पूछेसि फिर यीसु का करी जउन मसीह कहावत है। सब उहिते ऊ कहिन सूली पर चढ़ावा जाय।

²³हाकिम कहिस काहे ऊ कवन बुलाई किहिस हय? मुला ऊ चिल्लाय चिल्लाय कै कहै लाग कि सूली पै चढ़ावा जाय।

²⁴जब पीलातुस देखिस कि कछु नांय बन परै मुला जाके विपरीत हुल्लड़ मचत जात है, तौ उइ पानी लैके भीड़ के सामने आपन हाथ धोइस अउर कहिस हम ई धरमी के लोहू ते निरदोस हन तुम ही जानेउ।

²⁵सब लोग कहिन ईका लोहू हम पर अउर हमरी सन्तान पर हुवय।

²⁶ई पै उइ बरअब्बा का उनके खातिर छाड़ि दिहिस अउर यीसु का कोड़े लगवाय कै सौपि दिहिस कि सूली पर चढ़ावा जाई।

सिपाहिन क यीसु केर ठड्डा मां उड़ाव

²⁷तब हाकिम केर सिपाही यीसु का किले मां लइ जायकै सगरी पलटन वहिके चारिउ ओर यकट्टी होई गये। ²⁸अउर वहिके कपड़ा उतारि कै वहिका किरमिजी बाग पहिराइन। ²⁹अउर कांटन का मुकुट बनाय कय वहिके सिर परई रखिन; अउर वहिके दहिने हाथ मा सरकंडा दिहिन अउर वहिके सामने घुटने टेकि कै उइका ठड्डा मां उड़ावै लागे कि हे यहूदियन के राजा नमस्कार। ³⁰अउर वहि पै थूकिन अउर उई सरकंडा लै कय वहिके खोपड़ी पर मारै लाग। ³¹जब उई वहिका ठड्डा करि चुके तब ऊ बागौ वहि पै ते उतारि कै फिर वही केर कपड़ा पहिराइन अउर सूली पै चढ़ावै तई लै गै।

यीसु क सूली पै चढ़ावा जउव

³²बाहेर जात समय उनका समौन नाम एक कुरैनी मनइ मिला अउर उइ वहिका बेगार मां पकरिन कि वहिका सूली उठायकें लै चलव। ³³अउर उई जगह पै जउन गुलगुता नाम केर जगह कहावत रहै हुआं पहुँचिकै। ³⁴उई पित्त मिलावा दाख रस पियय का

दिहिन मुला ऊ चख कय पियय का नाही चाहिस।

³⁵तब उई वहिका सूली पै चढ़ाइन अउर चिट्ठियां डारिकै वहिके कपड़ा बांट लिहिन। ³⁶अउर हुआं बइठ कय वहिका पहरा देय लागे। ³⁷अउर वहिका दोसपत्र, वहिके सिर पर लगाइन कि यह यहूदियन केर राजा यीसु हवै'। ³⁸तब वहिके साथ दुई डकुअन का एक दहिने एक बाएं सूली पै चढ़ाय दिहिन। ³⁹अउर आवय जाय वाले लोग खोपड़ी हलाय—हलाय कय ऊकी निन्दा करत रहे। ⁴⁰अउर ई कहि रहै, कि हे मंदिर का गिरावे वाले अउर तीन दिन मां बनावय वाले अपने कइहां बचाऊ। यदि तुम परमेसुर केर लरिका आव तौ सूली पै ते उतरि आव।

⁴¹यही मेर महायाजक अउर सास्त्री अउर पुरनिया समेत ठड्डा करिकय कहत रहय ई अउरे का बचाइन अउर अपने का नाही बचाय सकत। ⁴²ई तौ इसराएल केर राजा आय अब सूली पै ते उतरि आउ तब हम तौ पै बिसवासु करि लवै। ⁴³ऊ परमेसुर पै भरोसा करत है यदि ऊ यहिका चाहत है, तौ अब जाय छुड़ाय लियय काहे ते ई कहिस रहै कि हम परमेसुर केर लरिका आन। ⁴⁴यही मेर डाकू भी वहिके साथे सूली पै चढ़ाये गये रहय वहिकी निन्दा करत रहय।

यीसु केर मिरतू

⁴⁵दुपहर ते लइकय तीसरे पहर तक उई सगरे देस मां अंधेरा छावा रहै। ⁴⁶तीसरे पहर यीसु ने बड़े सब्दन ते पुकारिकें कहिन, एली, एली, लमा सबक्तनी? अरथात् हे हमरे परमेसुर, हे हमरे परमेसुर, तुम हमका काहे छाड़ि दिहेव?

⁴⁷जउन उहां खड़े रहय उनमा ते केतनौ ई सुनिकें कहिन, ई तौ एलिय्याह केर पुकार हयो।

⁴⁸वहिमा ते एक तुरंतय दौरा अउर स्पंज लइकय सिरके में वोरिस अउर सरकंडा पर रखिकय चुसाइस। ⁴⁹अउरों ने कहा रुकौ देखौ एलिय्याह एके बचावये आवत हयं कि नाई।

⁵⁰तब यीसु ने फिर बड़े सब्द ते चिल्ला के अपने परान तियाग दिहिन।

⁵¹अउर देखौ, मंदिर केर परदा ऊपर ते नीचे तक फटिकै दुई टूकरा हुइगे अउर धरती डोलि गई अउर चट्टानें फट गई; ⁵²अउर कवरै खुलि गई। अउर सोये हुए पवित्तर लोगन केर बहुते लासन जी उठीं।

⁵³अउर वहिके जी उठय के बाद उई कबरन मा ते बहिरे निकरि कय पवित्तर नगर मा गये अउर बहुतन कइहन दिखाई परे।

⁵⁴तब सूबेदार अउर जउन वहिके साथे यीसु केर

पहरेदारी कर रहे भूईडोल अउर जउन कछु भवा देखि कय बहुते डेराय गये, अउर कहिन साँचि ई परमेसुर का जउन लरिका रहय”।

⁵⁵हुवां बहुत सारी मेहरिया जउन गलील ते यीसु केर सेवा करती भई वहिके साथ आई रहै, दूर ते देखत रहै। ⁵⁶उनमें ते मरियम मगदलीनी अउर याकूब अउर योसेस केर महतारी मरियम अउर जब्दी के लरिकन केर महतारी रहै।

यीसु केर आखिरी संस्कार

⁵⁷जब संज्ञा भय तब यूसुफ नाम अरिमतियाह केर एक धनी मनइ जउन अपने आपय यीसु केर चेला रहय आवा; उइ पीलातुस ते यीसु केर लास माँगिस। ⁵⁸ई पै पीलातुस ओके दिवय केर आग्या दिहिन। ⁵⁹यूसुफ ने लोथ का एक उज्जर चादर मा रखिस अउर लपेट लिहिस। ⁶⁰अउर वहिका अपनी नवा कबर मां रक्खेस जउन ऊ चट्टान मां खुदवाइस रहै, अउर कबर केर दवार पै एक बड़के पथर लुढ़काय कय चला गवा। ⁶¹अउर मरियम मगदलीनी अउर दूसरी मरियम हुवां कबर के समनवै बैठि रहै।

यीसु केर कबर पै पहरा

⁶²दूसरे दिन जउन तैय्यारी दिनवा केर बादे दिन रहय, महायाजकों अउर फरीसीन ने पिलातुस के पास यकट्टा होइके कहिन। ⁶³हे महाराज, हमका याद हय कि ऊ भरमावे वाले ने अपन जीते जी कहत रहै कि हम तीसरे दिन मा जी उठबे। ⁶⁴सो आग्या देव कि तीसरे दिन तक कबर केर रखवाली कान जाय अइसा न होय कि वहिके चेला आय कै चुराय लै जाय अउर लोगन ते कहय कि ऊ मरे हुवन में ते जी उठत। तब पाछे धोखा पहिले ते खराब होई।

⁶⁵पीलातुस उनते कहिस तुमरे पास पहरूवा तो हय। जात अपन समझ केर मुताबिक ओके रखवाली करेव। ⁶⁶सो ई पहरूवा क उहाँ साथ लैकै गये, अउर पथर पै मुहर लगाय केर कबर केर रखवारी करय लागि।

यीसु केर जी उठब

28 सबत दिन के बाद सप्ताह के पहिले दिन पौ फाटत ही मरियम मगदलीनी अउर दूसरी मरियम कबर का देखे आई।

²अउर देखव एक बड़ा भूईडोल भवा काहे ते परभु केर एक दूत सरग ते उतरा अउर पास आय कै ऊ पथरन का ढुलकाय दिहिस अउर वहि पै बइठ

गवा। ³वहिका रूप बिजुरी अइसन रहय अउर वहिका कपड़ा पाले केर नाई उज्जर रहय। ⁴वहिके डरते पहरूवे कांपे लागे अउर मरे हुअन के समान हुइगे।

⁵सरगदूत ने मेहरियन ते कहिस कि तुम ना डेराव हम जानित है कि तुम यीसु का जउन सूली पै चढ़ाय दीन गवा रहै। वहिका दूढ़ति हव। ⁶ऊ हियां नाहीं है मुला अपने कहे केर मुताबिक जी उठा है अउर ई स्थान देखव जेहर परभु परा रहय। ⁷अउर जल्दी ही जाय कय वहिके चलन ते कहव कि ऊ मरे हुवन मां ते जी उठा हय, अउर देखौ ऊ तुमते पहिले गलील का जात हय हुआं तुम वहिका दरसन पइहव देखौ हम तुमते कहि दीन है।

⁸अउर उई भय अउर खुसी के साथ कबर ते जल्दी लौटि कय वहिके चलन का ई समाचार देय कि ताई दौरि परी। ⁹अउर देखौ, यीसु उइका मिला अउर कहिन सलाम। अउर उई पास आइके अउर वहिके पांव पकरि कय वहिका दंडवत किहिन। ¹⁰तब यीसु उनते कहिन, डेराव मत हमरे भाइयन ते जायके कही कि वे गलील का चले जांय उहाँ हमका देखिहव।

पहरेदारन केर कथन

¹¹उइ जाति रहय कि देखौ, पहरूवन मा ते केतनै नगर मां जाय कै पूरा हाल महायाजकन ते कहिन। ¹²तब उई पुरनियन के साथ यकट्टे हुइके विचार किहिन अउर सिपाहिन का बहुत चांदी दे कै कहिन। ¹³कि ई कहेन कि रात मा जब हम सोये रहेन तब वहिके चेला आयकै चुराय लइगै। ¹⁴अउर जदि ई बात हाकिम के कान तक पहुंची तब हम वहिका समझाय लेव अउर तोहकी खतरा ते बचाय लेव। ¹⁵सो उई रुपया लै कै जइसन कहा गय रहे किहिन अउर ई बात आज तक यह यहूदियन में परचलित है।

महान आदेस

¹⁶अउर ग्यारह चले गलील मां उई पहाड़ पै गये जिसे यीसु ने उनका बतावा रहा। ¹⁷अउर उई वहिके दर्सन पाय कै परनाम किहिन पर कोई—कोई का संदेह भवा। ¹⁸यीसु उइके पास आयके कहिन, कि सरग अउर धरती का सगरो अधिकार हमका दिया गवा है। ¹⁹यहिकी ताई तुम जायके सगरे जातिन के लोगन का चेला बनावौ अउर उनकौ बापू अउर पुतर अउर पवित्तर आतमा के नाम ते बपतिसमा देव ²⁰अउर उनका सारी बातन जउन हम आग्या दीन हय मनइन का सिखाउ अउर देखौ हम संसार केर आखिर तक हम हमेसा तुमरे साथे रहन।